

東
華
續
錄

光緒一百五十五

臣朱壽朋敬編

臣沈彭年恭校

秋七月丙午朔時享 太廟遣魁斌恭代行禮○蘇元春奏奴才自光緒十一年撤兵入關籌辦廣西邊防計沿邊一千八百餘里其府州縣屬各關隘近與越民往來者法國均派員駐紮越邊交界地方料理交涉事件年前游氛未靖中外嚴緝法員等均能認真辦理上年先後設立對汛十二處彼此照會往來皆能恪守約章遇事妥為商辦各法員仰慕 皇仁每於面商交涉事件之時切囑奴才請給寶星佩戴共沐 中朝恩膏 奴才當對以俟對汛章程安定之後再為奏請計法員派駐越邊每屆三年更換一次溯自光緒十一年至今已屆五次更替之期現在對汛事件均經籌定章程彼此相安和衷妥辦查近年各省通商口岸辦理中外交涉事件各西員均有奏請 賞給寶星之案所有法國派駐越邊各員似應查照成案辦理茲據法員開單在事各員十九名請給寶星前來 奴才按照繙譯具列清單分別等次仰懇 天恩可否給予寶星以示鼓勵之處出自 逾格鴻施待 旨如所請行○庚戌劉坤一奏臣承准軍機大臣字寄光緒二十五年四月二十五日奉 上諭前因天津上海江甯湖北等處均有製造鎗械

局廠諭令該督等切實會商務將所製鎗礮膛口子彈各局統歸一律以期通用並將每年所造鎗件子藥若干據實奏報並按季咨報戶部神機營查核現在爲時已久並未據報有案鎗礮爲行軍要需豈容因循延玩著裕祿劉坤一張之洞詳晰查明各該局廠所造鎗礮究係何項名目是否業已會商造成一律迅卽切實奏覆嗣後仍遵前有按年奏報並按季分別咨報毋得延宕該督等務當懷遵迭次諭旨督率承辦各員認真經理精益求精互相接濟臨時不致缺誤倘該管局員草率從事虛糜經費或演放時有炸裂等項情弊定卽治以重罪決不稍從寬貸將此諭令知之欽此遵 旨寄信前來等因承准此遵卽恭錄咨行會商查議在案伏念時局艱鉅自以練兵製械爲當務之急設局製造鎗礮允宜進求精利力戒因循疊次欽奉 懿旨 諭旨飭令就地籌款擴充製造並鎗礮子彈均須一律合膛各等因仰見 宮廷宵旰憂勤謀深遠重 泰厲彌寄時目時艱倚馬枕戈昕夕敢忘儆戒節經督飭各該局員將出入款項核實勾稽製造軍械詳細考究並令與天津機器局湖北鎗礮廠隨時知照互相請求復由上海局員馳赴湖北比較數次兩局所造鎗礮子彈格式分量口徑大小現均一律合膛並無歧異已將製造鎗礮數目大概情形由電奏陳當蒙 慈鑒查江甯製造局所造後膛礮係屬新創各處均無此式其兩磅子一磅子後膛快礮亦與滬製一律此外礮架礮彈各種鎗子拉火等件歷經解由南北洋分撥各

軍應用祇以經費有常欸項奇絀未能加撥以期擴充惟該局設在江甯城外歷經締造粗具規模且居腹地形勝之區一旦海疆有事尙須在此製造接濟中需庶幾緩急足恃至上海製造局所造各項快礮除礮臺需用之大礮外其四十一磅一種卽北洋之十二生的快礮十二磅一種卽北洋之七生的半快礮六磅一種卽北洋之五十七米里快礮兩磅子一種卽北洋之七生的半亦卽湖北之三生七快礮洋礮名稱雖殊尺寸則不差累黍今由該局與天津湖北兩局逐一比試均無參差其快利新鎗係就舊機參用人工所造亦頗便利究嫌費工多出鎗甚少去年遵飭各軍改用小口徑毛瑟鎗本擬訂購此項鎗枝鎗彈機器專壹仿造以歸一律訪之滬上各洋行需欸百萬爲期三年一時無此財力遂仍用舊機更易機件添配車座訂購改造七美里九口徑毛瑟鎗枝鎗彈機器等件按照合同每日出鎗十枝現將到齊安裝告竣當飭該軍員司興工監造嚴定課程如有廢弛虛糜據實參辦並按年按季將製造軍械數目分飭造冊奏報以昭核實惟值 朝廷整軍經武之秋疊飭天津湖北上海江甯各局應迅速擴充製造鎗礮以供各省各軍之用備像不虞允操自強之勝算臣查各局兼造各項快礮均係新式尙敷應用至仿造小口徑毛瑟鎗僅祇湖北上海兩廠其機器一係新購專門一係舊式更改能力所限造鎗之數目多少懸殊各處通用恐難備給前與直隸督臣裕祿湖廣督臣張之洞往返籌商添購造鎗新機無

論津鄂甯溫何廠承造節擬電覆咸以款絀爲詞惟製造能否擴充軍火不至減少胥視經費之盈絀以爲衡江甯製造之需向由南北洋照額勻撥歲有常經上海則專恃二成洋稅以資工作但冀稅收暢旺撥款加增各司道局分認改撤三廠常費依期籌解除備常年操防軍火而外擬令極力撙節另款存儲以備添購仿造小口徑毛瑟鎗機器一部並一面與洋行照式議購所立合同分期交款要以數年內機器購齊其有不敷另再設法辦理俾與湖北鎗礮廠分途仿造可期儲備日裕器械日精藉以仰副聖主建威銷萌之至意下所司知之○劉坤一奏臣於光緒二十五年四月十五日承准軍機大臣字寄上諭練兵爲當今最急之務迭經諭令各直省認真訓練現據將軍督撫先後覆奏各省所練兵勇多寡不同總以精強爲主庶幾制勝可期現在訓練已經數月當已確有成效際此時艱孔亟折衝禦侮必須備豫不虞著各將軍督撫隨時認真校閱務使悉成勁旅毋得稍涉懈怠仍將練成各營確數暨陣法技勇如何限三箇月先行具奏聽候次第調取來京閱看將此諭令知之欽此臣跪誦之下欽服莫名當此時局多艱練兵一事實爲切要之圖江南各軍除自強軍馬步礮隊十一營及親兵一哨共兵丁二千六百四十名早經練成已飭精益求精毋稍懈惰外其餘各防營經臣奏明將分駐吳淞江陰鎮江江甯之盛字五旗江勝六營新湘五旗南字三旗親軍七旗護軍三旗衛字三旗共三十七營旗一律改練德操

由自強軍挑選排長前往教習核計每營勇丁五百名每旗二百八十六名共計勇丁一萬一千八百六十六名於上年十月初一日開辦臣每接見各將領必恭述 詔旨嚴切 宵旰憂勞品之以忠義曉之以利害務須加緊訓練成勁旅將缺額餉餉各弊一掃而空各該將領身受 國恩大良其在尙知感激奮勉不敢玩愒因循數月以來督同營哨官弁教習按照德操認真教練如步伐之進退疾徐鎗法之遠近高下陣式之分合變化均各實力講求朝夕無間雖功候較淺未能遽及自強軍之純熟而整齊精壯實已有成效可觀臣仍當嚴申紀律隨時校閱務使日臻精進可備緩急足以副 朝廷整軍經武銳意自強之至意至應令何軍先行北上恭候 諭旨遵行得 旨知道了卽著督飭各軍隨時認真訓練務期日臻精進可備緩急○辛亥諭御史熙麟奏散館知縣服闋回省請准其繁簡揀補並六部實缺員外郎請照郎中主事例酌定保送揀取章程各摺片著該部議奏○癸丑諭剛毅奏條陳籌餉事宜一摺詳加披覽所陳整頓釐金關稅鹽務裁併局所各條比年以來迭經諭令各省將軍督撫逐款清理認真舉辦奚止三令五申剛毅所奏剔除中飽杜絕虛糜油爲切中肯綮至所請酌提各海關盈餘釐定各省釐金比較並疏通壓綱籌增引數以維鹽政各該省情形不同仍著該將軍督撫詳加體察切實妥議請旨遵行其裁併局所一節仍遵屢次諭旨實力辦理毋稍瞻徇至於清理田賦事關丁漕正供虛報捏

飾尤非良有司因地制宜無以收裕課恤民之實效並著各該省將軍督撫體察情形悉心籌辦方今時局艱難籌餉實爲當務之急要在能識大體張弛得宜總期有裨於國無損於民仍將各項遵辦緣由隨時覆奏戶部爲度支總匯卽著將剛毅原摺通行各省以便仿行此後部庫一切款項尤應格外慎重逐加綜核開源節流是在中外諸臣共矢公忠力維大局不負朝廷諄諄誥誡之意實有厚望焉將此通諭知之○剛毅劉坤一德壽奏臣剛毅前將查勘蘇屬荒田畝大略情形於本年五月初十日附片陳明在案當經照商臣坤一並與臣德壽往返函商來蘇後復悉心面議均屬意見相同卽經檄派蘇藩司嚴緝煥候補道朱之榛督同蘇州府知府爲秀擬議章程詳候核辦去後伏查同治四年蘇省四府一州減賦定額實應徵米豆一百四十八萬一千餘石地清正耗銀二百二十七萬七千餘兩近年各屬報徵起存銀米撥諸定額尙少十分之二四由荒田未盡開闢實亦捏熟作荒居其大半竊計松常太三屬徵數早逾九分鎮江僅徵七分蘇州不過六分統核蘇屬熟田業逾九分而徵數止此是其弊尤以蘇屬爲最鎮屬次之常太又次之推厥弊所自始由於州縣之匿報者有之由於紳戶之包抗者有之由於葑蕀之侵蝕者有之匿報之弊非盡州縣之無良也大戶完不足數勢必無力賠墊不能不仰鼻息於總冊始則設法弊混以顧者成繼且分潤盈餘以肥囊橐然而紳士並未有所礙者則以捏熟作荒之數官紳各居

其半且樂得挾其短長以爲包抗地步官亦因報微不實明知各戶包攬益不敢問此其弊之在官者也
潮查減賦案內永革大小名目其繼借善堂爲詞減折完納繼則紳士效尤減完繼又以已產不足復覓
小戶詭寄之產代爲包完大戶日多小戶日少官不敢請吏不敢問此其弊之在紳者也糧書差役本屬
惟利是圖實徵之數獨總書知之最悉剖分多寡高下彌縫樞紐悉繫於總書刁生劣監知其然也因而
勒索清規名曰挪借該書藉口虧累益得售其因緣爲奸之術此又弊之在書差者也三弊相因舉國
家每歲應徵熟田錢糧合計不下數十萬兩暗蝕於無形顧弊在官可撤可參弊在書差可斥革懲辦獨
在紳戶大半指紳望族其中潔白自好者固不乏人而不肖者倚此爲生聲氣廣通黨援徧樹欲圖整頓
傾陷隨之官斯土者遂不敢議及清賦一事直竊意自治先於治人轉移澆風首在澄清吏治原其包抗
短完每藉統造之事爲口實蓋各屬別荒徵熟所造之串應照報徵數是爲板串蘇屬肅清以後造串悉
按熟田之數不按報徵之數是爲統串今惟責令先從開報熟田入手一律普造板串實徵實解不准再
造統串以遂其通挪之私如是則州縣報之弊除在官之積弊既清紳戶不能有挾而求刁健者失所
憑依謹厚者轉相勸化包抗之風亦可杜絕至於書差本視官之志趣爲轉移尙屬易治者也現據該司
道等擬具清賦章程五條聲明隨漕漕項亦併飭令照額如數完解不准解至九成以上致有帶欠具詳

前來臣等察核所議辦法尙爲妥善當卽飭令剋日舉辦並各屬隨報熟田應徵銀米查齊彙數詳候覆辦暨真正荒田趕緊勒限招墾以符定額伏念清賦一役係杜官紳吏胥中飽並非徵荒加賦可比既無傷於元氣亦不累及小民約略估計當可歲增漕糧二十萬石條銀稱是獨是匿報之州縣包抗之紳戶侵蝕之書差窟穴其中已閱三十餘年必多有所不便保無借端騰謗希冀阻撓承辦之員或存卻顧擬請 明降諭旨責成該司道認真辦理藩司職掌通省錢穀本分所當爲之事責無旁貸務卽通檄所屬州縣各以實心實力相輔毋存畏首畏尾之見如或抗違許其官則參革紳則參追書差立予重辦於正供漕賦大有裨益猶恐不法衙蠹捏稱徵荒加賦希圖勒派浮收或業戶因銀米不能短完益思取償於佃設法加租以致重困小民卽經會銜出示諭禁諱將示稿恭錄進呈 御覽 上諭剛毅等奏查辦江蘇清賦事宜一摺近年蘇省徵丁漕揆諸定額約短十分之二固由荒田未盡墾闢而捏熟作荒之弊亦不能免現經剛毅等嚴飭清查先令開報熟田一律繕造板串實徵實解自光緒二十五年爲始民間完解銀米概不准分大小戶名如有州縣匿報紳戶包抗官則參革紳則參追此係爲杜絕捏荒中飽起見並非徵荒加賦嗣後該督撫務當督同司道嚴飭各該州縣實力稽徵不准藉詞藉欠○乙卯欽奉 慈禧端佑康頤昭豫莊誠壽恭欽獻崇熙皇太后懿旨孫家鼐奏病仍未痊懇請開缺一摺孫家鼐老成

持重辦事精詳現在久病未痊實深廕系著再徵假一月安心調理毋庸開缺並加恩賞給人參四兩俾資調攝○戊午諭戶部奏遵議倉場開放糶米章程一摺倉場應放八旗甲米原定粳粳輪放章程據該衙門奏現存糶米不敷撥放尙係實在情形卽著每年春季開放粳米夏季開放糶米秋冬二季均一律開放粳米其各倉輪放粳米時仍照九新一陳開放復盤之倉照所議新陳成數開放所有復盤案內應補米不得全補陳米各該倉買補若干應先期報部著戶部派員查驗入倉如有別項情弊卽將該監督等據實參處○辛酉鄧華熙奏安徽省民貧地瘠向非繁富之區近年時事艱難餉需不繼庫儲空匱撥款日增籌解已甚爲難開源更無良策上送奉 諭旨飭令設法整頓一再督同藩司悉心籌畫非就漏卮之大者力行杜塞不足以資補苴而供挹注查安徽本地出產以米糧爲大宗本省庫金亦以取諸米糧者爲大宗近因各省委員來皖採辦官米販米絡繹於途或奏准免釐或咨請免釐所辦米數既多所免釐金卽亦不少且恃有護照夾帶影射諸弊叢生往往不服稽查釐款更多虧耗欲求補救之策惟有停止免釐之章現擬極具輕重分別完免官米惟漕糧一項仍不抽釐江安糧道應辦江北河運多係派員至皖辦米宜飭先將派員赴何處辦米若干分晰開單稟明以便轉飭該處釐卡按護照所開數目盤查放行外倘有溢數照章抽收本省今年冬漕始辦米起運亦照此辦理軍米惟武衛軍兵糧一項照

蠲免釐該軍拱衛 京師所關重要北地糧米來源不易藉此體恤民艱其餘無論何省委員來皖採辦
官米軍米賑米以及積穀平糶等糧石均應照章由各卡一律抽釐本省採辦前項各糧亦均一體完納
以昭平允庶期本省之釐款不致虧蝕於無形而釐金項下奉撥京協各餉堪以及時分解無誤要需下
戶部知之○鄧華熙奏 接准戶部咨光緒二十四年十二月十六日奉 上諭軍機大臣會同戶部遵
有議擬各省丁漕錢糧折合銀兩酌中定價一摺各省地丁漕糧例准折錢交納原為便民起見惟近來
銀價日落錢價日漲在民照常交納在官已多盈餘以致止供所餘悉歸中飽殊非體恤民艱之意著各
將軍督撫嚴飭藩司糧道查照本省銀錢通行市價將丁漕銀米按照時價折錢若干以錢合銀均按庫
平庫色為斷每月酌中奏定數目徵收以歸畫一如有不肖州縣巧立名目藉端浮收即著從嚴參辦將
此通諭知之欽此鈔錄原奏咨行趕緊奏覆等因當即行知藩司糧道欽遵妥速議詳去後茲據布政使
湯壽銘詳稱安徽省各州縣地丁錢糧定章本係徵銀向有無銀可換及零星小戶以錢折納者各就地方
情形按照時價折收辦理倘為平允漕糧一項兵燹後改徵折色經司詳定價值一律折錢徵收由州縣
易銀批解其傾工火耗解費以及州縣辦公平餘書吏紙飯等項亦按各該州縣向辦章程以額徵之多
寡分別裁減酌定隨正徵完迄今三十餘年官民稱便近年銀賤錢貴漕糧之折錢者先飭減數核收嗣

又與漕糧折徵錢價平餘分別減徵提解均經奏咨有案現在欽遵 諭旨體察情形悉心籌議通省銀錢價值市面漲落參差非惟南北相隔之區高下不等卽一屬之內亦復早晚不齊如果按年酌中限以一定數目在銀價較昂之處錢價見輕民間固樂輸將州縣必稱賠累倘該處銀價平賤又恐不便於民完納不前轉致徵收有礙擬請申嚴稽核之法飭令各州縣每年於上下兩忙放徵時除向來徵銀各局外其餘將是否銀錢並徵及折徵錢文仍各按地方時價折算先行詳明立案並隨時牌示倘前不准多收錢文暨將以錢折銀各數按司專案通報以便稽查而杜含混如有不肖州縣高擡價值額外浮收一經查明卽詳請從嚴參辦似此考察嚴密銀錢隨時價爲定衡州縣無從多收小民亦不致苦累等情復請奏咨前來臣覆加查核所議辦法尙屬核實相應請 旨俯准照擬辦理以杜弊混而恤輿情允之○
鄧華熙奏安徽官遵 旨籌設武備學堂並 旨著東偏原有演武廳一所操場寬廣餘地空閑量將舊屋修改添造四十餘間於上年八月興工因作爲武備學堂參酌南北洋教法訂立章程學生以四十人爲額報者本省外省員弁及官紳子弟肄習兵學咨調北洋陸師學堂出力歷練成材之二人分充教習臣擬定辦法於上年十月具摺奏准在案該學堂工程臣先期派委候補知府許以增勘估繪圖呈閱核定飭令舉辦共計新舊房屋修改二十四間並葺修演武廳及照牆門樓等處添造四十一間暨新增門

庫照壁等項均於十一月一律完竣報部札行藩司委員驗收均係工堅料實並無草率偷減取具保固切結存查其工料價值共計庫平銀八千九百餘兩飭在防軍支應項下先後動支應用臣照奏案遴派總辦稽查等員經理該學堂事務北洋大臣揀選教習二名於本年二月咨送到院各處應考學生照額取定於三月間赴堂肄業臣就近督察教學認真復經南洋大臣訂延東洋將佐一員來堂教習以期藝業精進每月應需經費在於奏留防餉裁節款內核實開支給發領用下部知之○諭軍機大臣等劉坤一奏崇明及白茆等處地勢不宜建築礮臺一摺覽奏已悉既據該督查明崇明之四激六激係處海濱河質鬆浮易於坍塌白茆口老港新港距岸太遠均不宜建築礮臺虛糜薪費所有該兩處添設礮臺一節卽著毋庸置議此外險要各口仍著該督會商提督李占椿督同蘇松狼山福山三鎮總兵詳細查勘有無應行添設礮臺之處一面將各該處防務派定隊伍嚴密布置其布甯撤餉等事宜亦應預行籌畫毋得稍涉疏虞將此諭令知之○丙寅福建汀州鎮總兵朱得勝率賜卹照提督軍營立功後積勞病故例戰功事蹟交國史館立傳並予諡○丁卯以何得彪爲福建汀州鎮總兵○戊辰諭倉場衙門奏部議開放糶米章程仍有窒礙請飭部再行核議一摺著戶部詳細核議具奏○庚午欽奉 慈禧端佑康頤昭豫莊誠壽恭欽獻崇熙皇太后懿旨大學士徐桐年逾八旬遇有召見出入加恩著太監扶掖以示優

奏○辛未諭軍機大臣等有人奏江西清糧加價請展限期並嚴禁糧差墊納以蘇民困一摺據稱江西清糧向係九月開徵按一月爲一限逾限照章加價該省晚稻必至十月成熟九月尙無米穀可售民間無錢完納溝米糧差墊納勒索數倍小民不堪魚肉請飭變通舊章展限一月等語著該撫督同糧道體察情形妥定章程奏明辦理其糧差墊納勒限情弊卽行一體嚴禁以恤民隱○增祺管昌奏查接管卷內上年十二月十三日承准軍機大臣字寄光緒二十四年十二月初七日奉 上諭依克唐阿等奏鵬等翎擬請暫緩捕打一摺據稱金州鵬廠現有俄兵往來施放洋鎗鵬驚遽避以致該兵無從圍捕等語鵬翎係上用要需除金州外是否尙有捕打之處著依克唐阿等查明具奏將此諭令知之欽此遵旨寄信前來當經原任將軍依克唐阿欽遵督飭承辦司員查明 盛京所屬除金州外實無堪設鵬廠處所復以事關 上用要需亟應設法籌備飭司妥議去後旋據該工司員以從前除金州捕打鵬外每屆秋末冬初該處獵戶時有弋獲鵬鵠來省零售爲數無多惟有將此項鵬翎在省採買但能否足額未敢預定請以本年冬季爲始撥款試辦來年五月及時進呈核計需款甚鉅應請奏明辦理等情稟覆核辦移交前來奴才等伏查此項應進 上用重尾鵬翎二副芝蔴鵬三百二十七副虎班鵬翎十副鵠翎七十二副皂鵬翎二副共計四百一十三副係每年金州捕打之數今若改捕爲買其能足額與否

固難撥必再四籌維會是亦別無良策合無仰懇 天恩俯准暫行撥款採買以供要需如蒙 俞允所
需款項卽請按年由 盛京戶部銀庫照數關領報可○壬申諭軍機大臣等江西地方上連湘鄂東接
皖吳爲長江扼要之地且南贛等屬毗連粵境近年時有會匪出沒該省防練各營共有若干近來分布
扼紮是否足資得力臬司陳澤霖於營務訓練事宜尙能諳習卽著將江西全省營務責成該臬司認真
經理切實講求應如何分派駐紮勤加操練隨時稟商松壽妥籌辦理該撫仍不得以經理有人稍存推
諉將此諭知松壽並傳諭陳澤霖知之○癸酉以李興銳爲廣西布政使張曾敷爲福建布政使萬培恩
爲四川按察使○甲戌允俞廉三奏予故陝甘總督楊昌溶於湖南省城建祠列入祀典○乙亥諭山西
汾州府同知朱煜廣東駐防漢軍監生門定燾前因通曉醫學保薦來京隨同太醫院請脈惟朕躬服藥
日久未見大效朱煜門定燾均著飭回原省

八月丙子朔諭御史秦璽揚奏江北河運漕米勞費太甚擬請停辦一摺著戶部議奏○魏光燾奏臣前
准軍機大臣字寄光緒二十五年五月二十六日奉 上諭四川甘肅陝西山西等省俱可由陸路直達
京師運餉較便各該省藩庫除本省開支暨解京協各餉外庫儲是否尙有盈餘著該督撫查明實在
數目具奏將此諭令知之欽此遵 旨寄信前來臣當卽欽遵行司遵照速卽查覆去後前據藩司李有

奏詳稱查明陝省自光緒二十四年額收地丁耗羨釐金正雜各款除由州縣留支屯丁兌倉請留供兵撥協留支撥支各官廉費等外實收解司共銀二百五十萬五千三百餘兩本省開支例額廉費俸工夫馬祭禮一切雜支及奉撥兵勇京協各餉添練八旗洋鎗步隊及重軍月餉營旗薪餉被災賑撫鐵路內務府各經費懲遺英德俄法借墊釐金三成買糧等項共支銀二百六萬六千六百餘兩解部酒糖各釐烟稅各取減平共銀二十九萬二千五百餘兩新章減平候撥封存銀一萬四千九十餘兩入撥留備款銀二十二萬一千七百餘兩係全數備支京甘各餉及由船廠改撥北洋練軍經費之需以上照二十四年奏銷之案通盤核計歲收較支尚餘一萬三百餘兩歷年大致不甚懸殊陝中入款本屬有限近年奉部派撥之款歲有增加如每年洋債之二十萬兩北洋練軍餉五萬兩重軍月餉二萬三千兩又本省加練洋操飛練步隊等項及武備學堂中學堂歲需餉費十萬餘兩通計歲增出款四十餘萬兩幸每年催收地丁各屬尚能踴躍開墾荒地錢糧漸增近年整頓釐金較之光緒二十年以前每歲加增不下二十餘萬兩加以兵糧變價之四萬兩節省裁兵之十萬餘兩每歲約可增四十餘萬兩賴以抵支而庫儲仍未能充裕等情具詳請奏前來臣覆核無異謹恭摺陳下戶部知之○硃光緒奏臣前據朝邑縣知縣梁乃廣稟該縣黃河近年日漸西徙逼近城垣關繫重大應如何妥籌防護請示遵辦等情當經批司飭

委准候補知縣劉霖候補通判李聰前往會同該府縣逐一履勘稟覆核辦茲據同州府胡湘林
督同該印委等官勘稟覆勘得黃河自縣北華村入境斜趨趙渡鎮出三河口河道長七十餘里兩岸沙
灘寬四十餘里河西寬十餘里至二十餘里不等若遇河水漲發瀾漫橫流望無涯際近來河水西齧西
岸村莊地畝逐漸坍沒入河趙渡鎮現尤岌岌可危該縣城東距河最近處相隔祇九十餘丈道光年間
創開分河旋濬旋淤迄無成功光緒十六年前撫臣鹿傳霖於正東北及下淤各處修築堤壩工程極為
堅固仍被衝刷實緣河自積石以抵龍門擊崖懸瀉東流一綫奔射澎湃有如箭激朝邑相去二百里勢
雖漸殺而力未全減河岸悉賴泥沙掬挖十數丈並無實土堤壩所在水漲底沙立潰殆難以人力阻遏
現在趙渡鎮一帶居民多自遷徙縣城偏距河流日近博採輿圖竅謂莫如移就高原使民無後患歟不
揣鄙陋查該縣城西北隅有大寨兩座地勢最高擬連兩寨合為一城居民有願遷移者聽之若有無力遷
移者即派水惠亦可就近移居該地紳民咸以為請勘估經費亦僅一萬一千餘金請公家籌款四千金
不足由該縣差徭項動支可期釐事再兩岸被衝地畝除歷次豁免錢糧外現在續塌不少及退水未
種灘地懇請豁免錢糧以恤民艱等情並繪具圖說由藩司會核具詳前來臣查該縣黃河地勢東高西
下水流既屬湍湧河底又極鬆浮開引河則水勢汎溢時慮淤淤築石壩則工縱堅實仍虞墊陷且需款

勦逾百萬保固均無把握安敢造次以圖臣前於出巡之便輕騎履勘訪詢相度皆係實在情形所擬接
纂修城自是穩妥辦法所需經費仍飭確勘另行核奪其屢年西岸續被水衝地畝實有若干水退未種
地畝是否有糧民地能否墾種除飭再行確查另由道府履勘詳辦得旨如所請行○丁丑祭先師
孔子廟遣散信行禮○延茂成勦奏吉林武備學堂已著成效業經奴才延茂另摺奏報該學堂創設之
初曾經前將軍長順聲明辦有成效再籌款擴充等因奉諭旨允准在案惟該學堂肄業原係旗民
兼收奴才等以吉林旗丁類多精壯滿洲世僕本易啟其尊君親上之心士著相親尤易聯其敵愾同仇
之誼每欲精練大支勁旅以備防守徵調之需第念練兵實效必先有諳練之士足資分布廣爲訓迪庶
幾儲材衆而取用宏當與十旗協領詳細籌議仿照邊軍武備學堂章程推廣辦理於去歲校閱本省十
旗秋操後未令遽散歸農卽就其中之年力富強資質聰穎者挑選二百名擇地訓練名十旗武備學堂
升任副都統全營翼長明順親軍統領軍機處存記世襲三等子爵文福總理其事由戶司暫行籌墊津
貼復調武備學堂優等學生爲之教習又派委官分管各牌於考究武事之餘兼講忠孝大義俾其曉然
爲子爲臣之道以期學成有用之才正在開辦間適奉諭旨飭令各省籌餉練兵等因奴才等伏思驟
挑多兵微論餉項難籌卽倉猝成軍烏合之衆教習少而兵勇多勢必多需時日是成軍速而奏效反遲

不如先設學堂勤加訓練今日學生即可爲異日之教習一旦成軍分布各營教者既多操演自易成軍
運而奏效或速吉林既難籌集鉅款驟練多兵則學堂之講求儲材愈不宜緩遂飭總理各員認真督練
現逾八月之久操法已有成效稟請校閱奴才往閱各操尙能整齊靈便人材均能造就當經面宣 朝
廷重視旗丁精求武備至意諭以勸學圖報以備緩急學生等均係那岐舊僕尙能踴躍從公本年五月
間遵 旨挑練武備軍一營由學挑充兵什至五十人之多眾兵自所觀摩訓練較爲捷便是亦小用小
效之驗惟邊軍武備學堂經費係由停演礮費項下助支各營抽調學生亦皆隨帶原餉今試辦十旗學
堂雖由戶司暫爲設措籌墊津貼款項究多不敷而且勢難持久既經操有規模所有該學堂學生薪餉
自應辦有常年餉欸俾資循序精進以底於成查吉林就地所籌之款均各有所專需惟全省撥捐經費
才等於上年釐剔整頓收數較從前暢旺異常謹擬即由此項盈餘項下指撥常年經費以資訓練而垂
久遠如蒙 俞允恭候 命下之日即將學堂一切章程妥擬具奏允之○戊寅祭 社 稷壇遣溥靜
恭代行禮○諭軍機大臣等前據甘肅布政使岑春煊奏度支奇絀請飭清釐庫款核實造報外銷收支
數目各摺片批稱廣東歷年挪用庫款積至八百三十餘萬未經報部者五百八十餘萬如查係實用應
准作正開銷嗣後外銷欸項一律報部等語廣東地大物博出入各欸爲數甚繁嗣後外銷之欸應如何

核實報部著剛毅悉心查核妥籌辦理據實具奏原摺清單著鈔給閱看將此諭令知之○諭前據甘肅布政使岑春煊奏廣東金積弊特參陸鍾欽之局員請旨查辦並督臣譚鍾麟信任潘燦王存善諸事廢弛前署藩司魁元以部差位置私人各摺片臆列廣東補用道候補知府王存善前辦抽釐金使坤甸項下欸案卷該藩司前在廣東分別存案發還仍可調核各等語岑春煊揭王存善一案前據譚鍾麟派委司道按欸查訓今請上存善並無浮冒侵漁之據茲又據岑春煊將前案王存善原案自行具奏並及譚鍾麟魁元袒庇瞻徇等情王存善前辦廣東抽釐金局務究竟有無侵蝕確據譚鍾麟魁元有無包庇情事著剛毅迅即秉公澈查具奏原摺片清單均著鈔給閱看將此諭令知之○辛巳剛毅奏奴才承准軍機大臣字寄光緒二十五年六月二十四日奉 上諭有人奏敬陳管見以裕利源一摺據稱輪船招商局電報局督辦之員盤踞把持積弊多端請派大員澈底詳查等語招商電報兩局前經明降諭旨飭令盛宣懷督飭在案官商人等迅將經營各項近年收支數目限三箇月分晰開具清單酌定餘利歸公章程專案奏報並寄諭剛毅飭令督同盛宣懷一併澈查原以輪船招商局務係官督商辦其各分局各輪船如有弊竇應由該局隨時自行整頓也前據剛毅奏由甯起程赴蘇查核招商電報兩局欸項著即懷遵前有督飭盛宣懷迅將酌提餘利歸公章程擬定以數奏明辦理當此時局孔艱該大

臣必能不避嫌怨實事求是萬不致任意聽在事各員多方掩飾置公家權利於不顧也原摺着鈔給
看將此諭令知之欽此遵 旨寄信前來查招商電報兩局前經督同盛宣懷清查欸目並酌提常年報
効銀兩業將詳細情形於七月初一日繕摺馳陳在案此次奉到 寄諭後復經咨取輪船招商局章程
暨全案卷宗督飭司員等逐一查核並准盛宣懷按照所參各節逐條聲覆如原奏謂該督辦向與各總
局各分局總辦幫辦等串通一氣互相分肥一旦遽令和盤託出不足以掩衆口而服衆心一節據覆稱
招商局本爲商業公司非同心一氣不能收指臂之效上海設有總局此外皆係分局惟總局有總辦委
員二人向由北洋大臣派委各分局皆董舉經辦並無總辦幫辦委員一切用人理財章法實與怡和太
平洋行彷彿難以官例相繩華商力量甚薄有股者多恃股恩爲生計總局刊布年結帳略稍有未明輒
來詰問必深明其毫無牽混而後已故衆口非督辦總辦所能辯也原奏局中利源甚旺歸公無幾竟供
實員中飽該督辦將所得餘利私擬假帳除商民股息外又復擅增股數作爲自己股銀任意添派股票
一節據覆稱盛宣懷接辦以來歸還官欸一百十九萬餘兩洋欸三十萬兩商欸一百二十餘萬兩並添
置新船新棧皆獲利歸公之欸各局各船各棧出入欸項由官局管局管棧之人各簽字樣據送銀錢股
票總領結兩聯單呈總辦簽字方能照發督辦無干預銀錢帳目之權何從私擬假帳原股二百萬兩因

歷年擴充輪船碼頭棧房乃將各股餘利用去公議以眾商應派之利撥作眾商股分增股二百萬兩必有一原股始有一新股無由派寫股票底冊具存皆可覆按原奏該員當將敵國若蘇州之留國上海之華盛紗廠湖北之公濟益官銀號此三大宗約數百萬金自招商局中使蝕而來一節據覆稱盛宣懷祖父皆以科第入仕伊父盛康由湖北鹽法道告歸光緒二年以五千餘金購留國盛宣懷至光緒十一年始接管招商局迨十九年間上海織布局焚毀奉北洋大臣奏派赴滬招徠新股十八萬兩就舊址設華盛紗廠事有奏案可稽湖北公濟益官銀號係同鄉人河姓所開亦收歇多年原奏初派局差須託人關說送銀若干大局總辦約一萬八千之譜幫辦及輪船正副買辦等按格降推一節據覆稱滬局總辦非督辦所派其餘董事多由局中僑人轉調或兄終弟及或弟去兄代或論資勞或由眾保盛宣懷接辦後初未用一新人至各船買辦向照搭客水脚清帳比較功過並據滬局商董保薦清單而定督辦更不過問原奏各局總辦如沈能虎黃祖絡龔照璣黃建莞等原非承贖之子亦非素封之家不數年均加捐道班離局蒞任一節據覆稱黃祖絡江右富家龔照璣皖北望族均非寒素亦未辦過招商局沈能虎於同治年間已薦保直隸候補道光緒十五年始委辦商局黃建莞向充津局董事以歷辦北洋要差薦保道員均非由捐納得官原奏輪船買辦司一切來往載貨水脚客商船價率皆以多報少至用度燈煤等費

則以少報多並有包攬水腳分毫不報且奸商託讓成數無從考核一節據獲稱輪船水腳招商局怡和太古三公司訂立合同每年一結公攤均非平時互相稽察洋人耳目最多此以意虛報之弊斷不能爲且載貨水腳皆由滬局總電與洋人議定價目不由買辦經管至船棧用度有定額用煤有煤表亦無從多報惟舟中搭客以多報少之弊勢所難免故三公司合謀稽核之法亦於此加嚴也原奏有路過聲勢之大員無不百般迎合一切程儀十倍於衆更交結官官鑽營極要是以多年未有舉劾者一節據覆稱招商局係合股經商之事迎合官員交結權要本皆無用之事祇以向有官督之名局外不知以衆商同主之生意疑爲督辦一人之私權節次糾彈查辦昭昭耳目實爲未能交結之據等情聲覆前來奴才查盛宣懷接辦商局創辦電局之始係曾借官款業經陸續還清現在兩局均屬商款商辦盛宣懷祇有督辦之名與官場之統屬有別實非一人所能專擅所稱各節尙係實在情形自應毋庸置議至餘利歸公章程前經陳明船局六萬電局四萬由該兩局常年報効於本月二十日奉到 硃批著照所請該部知道欽此應仍按照奏定章程辦理報聞○剛毅奏兩淮鹽務有垣商有租局有公收之商有埠主有鹽戶有煎丁近來淮鹽疲敝非復從前盛時可比其中窮困情形以煎丁爲最甚煎丁者大都鶻衣鵠面之流受僱煎煉日得幾何商人卽不克扣恐鹽戶尙不免有折給工費情事况補價既經減發必益思取償於

與丁遞相折扣以致所得甚微不謀一飽隨戶被扣不難仗舉貢生監之勢力出頭呈控與丁訐訟無路
呼籲無門言念及此尤堪憫惻無論商人家道殷實卽墾殖亦有恆產可依獨此藉力謀生之窮民而忍
令其長抱向隅乎現經奴才檄行運司轉飭各該場官各就當地體察情形酌定煎丁工價出示曉諭不
准墾殖絲毫折扣並嚴禁商人剋扣桶價致有遞相減折情弊仍應詳報鹽政衙門立案庶稍甦丁之
困得 旨覽○壬午太僕寺卿徐壽朋與韓國外部大臣樸齊純在韓國都城議訂和好通商條約十五
款其文曰 大清國大韓國切欲敦崇和好惠顧彼此人民是以 大清國 大皇帝特派全權大臣二
品銜太僕寺卿徐壽朋大韓國大皇帝特派全權大臣從二品議政府贊政外部大臣樸齊純各將所奉
全權字據互相校閱俱屬妥善訂立通商約款臚列於左 第一款 嗣後 大清國大韓國永遠和好
兩國商民人等彼此僑居皆全獲保護優待利益若他國遇有不公輕蔑之事一經照知均須相助從中
善爲調處以示友誼關切 第二款 自此次訂立通商和好之約後兩國可委派全權大臣駐劄彼此
都城並於通商口岸設立領事等官均可聽便此等官員與本地方官交涉往來俱用品級相當之禮兩
國表檔大臣與領事等官享種種恩施與彼此相待最優之國官員無異領事官必須奉到駐劄之國
批准文憑方可視事使署人員往來及專差送文等事均不得留難阻滯惟所派領事等官必派真正官

員不得以商人兼充亦不得兼作貿易倘各口未設領事官或請別國領事兼代亦不得以商人兼充若兩國所派領事官辦事不合可知照駐京公使撤回更換 第三款 清國商民並其商船前往韓國通商口岸貿易凡應完進出口貨稅船鈔並一切各費悉照韓國海關章程與徵收相待最優之國商民稅鈔相同韓國商民並其商船前往中國通商口岸貿易應完進出口貨稅船鈔並一切各費亦悉照中國海關章程與徵收相待最優之國商民稅鈔相同凡兩國已開口岸均准彼此商民前往貿易其一切章程稅則悉照相待最優之國訂定章程稅則相同 第四款 一韓國商民前往中國通商口岸在所定租界內賃房居住或租地起蓋棧房任其自便所有土產以及製造之物與不違禁之貨均許售賣中國商民前往韓國通商口岸在所定租界內賃房居住或租地起蓋棧房任其自便所有土產以及製造之物與不違禁之貨均許售賣在彼此通商口岸租地蓋房修建墳塋及交完地租地稅等事均應遵守該租界章程及紳董公司章程辦理不得違越二兩國通商口岸除各外國公同租界外如有一外國專管之租界則租地賃房等事一遵該租界章程不得違越三在韓國通商口岸所定租界外准外國人承租或暫租地段賃購房屋之處中國商民亦應享獲一切利益惟租住此項地段之人於居住納稅各事應行一律遵守韓國自定地方稅課章程在中國通商口岸所定租界外准外國承租或暫租地段賃購房

屬之處韓國商民亦應享獲一切利益惟租住此項地段之人於居住納稅各事應行遵守中國自定地方稅課章程四兩國商民在兩國口岸通商界限外不得租地蓋屋開棧違者將地段房棧入官按原價加倍施罰五凡在各口租地時均不得稍有勒逼其出租之地仍歸各國版圖六兩國商民由貨物所在之國內此通商口岸輸運彼通商口岸一遵相待最優之國民人所納之稅鈔及章程禁例 第五款

一中國人民在韓國者如有犯法之事中國領事官按照中國律例審辦韓國人民在中國者如有犯法之事韓國領事官按照韓國律例審辦中國人民生命財產在韓國者被韓國人損傷韓國官按照中國律例審辦韓國人民生命財產在中國者被中國人民損傷中國官按照中國律例審辦兩國人民如有涉訟該案應由被告所屬之國官員按照本國律例審斷原告所屬之國可以派員聽審承審官當以禮相待聽審官如欲傳詢證見亦聽其便如以承審官所斷為不公猶許詳細駁辨二兩國人民或有犯本國律禁私逃在彼國商民行棧及船上者由地方官一面知照領事官一面派差協同設法拘拿聽憑本國官懲辦不得隱匿袒庇三兩國人民或有犯本國律禁私逃在彼國地方者一經此國官員知照應即查明交出押歸本國懲辦不得隱匿袒庇四日後兩國政府整頓改變律例及審案辦法視以為現在難服之處俱已革除即可將兩國官員在彼國審理已國民人之權收回 第六款 中國向不准將米

穀運出外洋韓國雖無此禁如或因事恐致境內缺食暫禁米糧出口經地方官知照後自應由中國官轉飭在各口貿易商民一體遵辦 第七款 倘有兩國商民欺罔銜賣貨借不償等事兩國官吏嚴拿該通商民令追辦償欠但兩國政府不能代償 第八款 中國民人准領護照前往韓國內地游歷通商但不准坐肆賣買違者將所有貨物入官按原價加倍施罰韓國民人亦准請領執照前往中國內地游歷通商照相待最優之國民人游歷章程一律辦理 第九款 一凡兵器各項軍物如大小礮位及礮子開花彈子各種火鎗裝鎗藥筒附鎗刀刺佩帶腰刀等扎鎗硝火藥桶火藥烈火藥及他諸烈各藥等應由兩國官員自行採辦或商人領有進口之國官員准買明文方許進口如有私販運售者查拿入官按原價加倍施罰二鴉片在韓國係禁運之物中國人如有將洋藥土藥運進韓國地方官查拿入官按原價加倍施罰三紅參一項韓國舊禁出口中國人如有潛賣及出口未經政府特允者均查拿入官仍分別懲罰 第十款 兩國船隻在彼此附近海面如遇颶風或缺糧食煤水應許其收進口內避風購糧修理船隻所有經費均由船主自備地方官民應加援助供其所需如該船不在通商口岸及禁往處所私行貿易不論已行未行由地方官及附近海關官員拿獲船隻貨物入官違犯之人按原價加倍施罰如兩國船隻在彼此海岸破壞地方官一經聞知即應飭令將水手先行救護供其糧食一面設法

保護船隻貨物並行知照領事官俾將水手送回本國並將船貨撈起一切費用或由船主或由本國官
認還 第十一款 凡兩國官員商民在彼此通商地方居住均可僱請各色人等勤執分內工藝第
十二款 兩國陸路交界處所邊民向來互市此次應於定約後重訂陸路通商章程稅則邊民已經越
界者聽其安業俾保性命財產以後如有潛越邊界者彼此均應禁止以免滋生事端至開市應在何處
俟議章時會同商定 第十三款 兩國船船無論是否通商口岸彼此均許駛往船上不准私帶貨物
惟有時買取船上食用各物均准免稅其船上水手人等准聽隨時登岸但非請領護照不准前往內地
如有因事將船上所有雜物轉售則由買客將應完稅項補交 第十四款 此次所立條約俟兩國
御筆批准至遲以一年為期在韓國都城互換然後將此約各款彼此通諭本國官商俾得咸知遵守
第十五款 韓中兩國本屬同文此次立約及日後公牘往來自應均用華文以歸簡易○癸未諭胡聘
之著開缺山西巡撫著王之春補授未到任以前著何樞暫行護理○以周馥為四川布政使○丁亥諭
戶部奏遵議御史奏陳揚泰江北河運漕米勞費太甚擬請停辦一摺江北河運漕糧關係京倉儲積泰
行有年未便遽更舊制所請停止河運改折銀兩解部著毋庸議江北河運漕米仍著照章辦理其南北
運河並著各該督撫認真疏濬以利漕行○諭御史陳慶桂奏獲咎人員投効列保請嚴定章程等語著

該部議奏○諭榮祿奏特參營官藉詞扣餉違犯營規分統未能立時辦理請分別懲處一摺武衛中軍前路前營管帶官記名提督萬翔麟經榮祿查有剋扣各哨應發火食銀兩及剋扣平色並藉詞扣餉情事實屬膽大妄為業經該大臣飭將所扣餉項如數交清開放記名提督萬翔麟著卽行革職發往軍臺効力贖罪前路分統高州鎮總兵張士元平日漫無覺察現經翼長行查復不卽行稟揭希圖取巧彌縫亦屬咎有應得張士元著摘去頂戴並撤去分統降為前路後營管帶官以觀後效仍著榮祿通飭各營申明約束如有仍蹈前轍卽行一律從嚴懲辦以儆效尤而肅軍政○以董履高為貴州鎮遠鎮總兵○戊子祈雨道奏勸諭 大高殿恭代行禮○庚寅許應麟奏閩省附近各礮臺經臣親往履勘前路布置尙堪扼守惟邇來外洋戰法往往避實搗虛倘從臺後進攻不可無利器抵禦查泰西新式機器快礮每分鐘可六百出守隘最宜中當飭英商載運到閩試放極其靈便特因庫儲支絀礮價較昂祇能先購三尊俾弁兵演習一俟款項稍裕仍擬陸續添置以利操防計機器快礮三尊配無煙藥彈三萬顆並隨礮應用物件訂明該價共英洋二萬零三百六十元折合庫平銀一萬四千六百五十九兩二錢業由臣設法由稅釐項下籌給下部知之○辛卯允奎俊奏子故四川總督丁寶楨於四川省城建祠○癸巳諭殺虎口監督喇民奏稅務疲弊請嚴禁繞越力裁陋規一摺殺虎口關稅近年以來收數短絀繞越偷漏之

弊均所難免總由於守口弁兵禁緝不力甚至有得賄賣放情事著何樞魏光燾轉飭所屬文武地方官認真協同整頓毋得仍前玩愒至所請將羊羣綢緞磚茶等稅由歸化城木稅局就近抽收並由川稅局移設穀縣城各節著戶部議奏○甲午夕 月於西郊○內中以文光爲甘肅布政使胡廷幹爲湖南按察使○已亥祈雨遣溥偉詣 大高殿恭代行禮○諭魏光燾奏道員報効本缺節省銀兩作為官軍經費據情代奏等語陝西督糧道升允於道缺內節省洋費每年提銀四萬兩作為旗兵屯軍專款開闢荒地經費實屬深明大義公爾忘私升允著賞加頭品頂戴所有報効節省銀兩著分季解交司庫聽候撥用仍由該撫按年專案奏報該部知道○諭方今時事艱難凡練兵籌餉察吏恤民諸務需才孔亟惟求才之要首在知人大臣以人事君必須察明選公破除私見而後羣材競進各效智能用成自強之業嗣後中外臣工務當共矢公忠力臻上理凡進退人材均須循名核實勿以保薦援引爲樹私植黨之謀勿以徇囑欺朦爲市恩見好之地獎善勿濫懲惡勿寬庶幾大法小廉吏治蒸蒸日上用副朝廷勵精圖治之至意○諭我朝 列聖相承型方訓俗 聖祖仁皇帝頒諭十六條 世宗憲皇帝廣訓約共萬言涵育庶民民心固結仰懷 祖訓歷久長新凡我臣民皆當恪守爲特申諭各省督撫及有地方之責者懷遵 列聖疊次諭旨切實宣講凡京外書院學堂皆以講明 聖諭廣訓爲根本並責成各府州縣教官

躬蒞其事俾海內外臣庶咸知綱常名教之重以正人心而厚風俗毋得視為具文○常恩劉樹堂奏
等於光緒二十五年四月十七日承准軍機大臣字寄四月初六日奉 上諭練兵為當今最要之務迭
經諭令各省認真訓練現據該將軍督撫先後覆奏各省所練兵勇多寡不同總以精強為主庶幾制
勝可期現在訓練已經數月當已確有成效際此時艱孔亟折衝禦侮必須預備不虞著各將軍督撫隨
時認真校閱務使悉成勁旅毋得稍涉懈怠仍將練成各營確數暨陣法技勇如何限三箇月先行具奏
聽候次第調取來京閱看將此各諭令知之欽此遵 旨當信前來臣等跪誦之下欽佩莫名竊思方今
時局多艱之際凡練兵防守最為目前自強要圖茲檄調分駐甯台一帶三門灣等處各要隘並派浦乍
浦沿海諸口岸當經分佈詳晰奏報在案分飭駐紮各員之時勉以忠義堅以圖志授以機宜並令將官
督率兵勇就防加意認真訓練務期精益求精以資捍衛而固剿防各將領身受 國恩具有天良咸知
威奮誓以家志成城足可備緩急之用第內地亦應嚴防匪類煽動且杭州瀕臨江海新聞商埠在在均
關緊要一切尤應加意防範以免他虞省城兵力本已不厚除檄調各營海防外更覺單薄所恃者惟武
備新軍左營操法頗得機宜陸路五軍二十營合前敵二十九營水師八營俱皆訓練精熟如步伐之整
鎗瞄之準進退之捷分合之靈但能講究並駐防師營練軍新洋鎗隊兩營添練操礮隊等營現已操練

成軍由臣常恩督飭統領等官逐日認真訓練其步伐之整齊進退之靈捷精銳洵爲有效可觀臣等仍當各甲紀律嚴肅戎政隨時校閱務使日臻精進悉成勁旅似此滿漢練軍操防聯絡省費地方賴以安謐以仰副 朝廷整軍經武銳意精強之至意至應令調取何軍查閱之處恭候 諭旨遵行謹 旨知道了卽著督飭認真訓練隨時校閱務使悉成勁旅以備緩急○壬寅劉坤一奏臣於上年奏覆裁減各項用費案內聲明淮南廢岸力圖規復以拓利源在案當查湖南瀏陽縣廣二百二十里袤二百一十里地居長沙上游東界平江及江西之義甯州新昌縣南界醴陵及江西之宜春萬載萍鄉等縣西界安化茶陵等縣北界長沙平江等縣戶口繁盛向未設局分銷其地界平江者多食城鹽界義甯州者多食西鹽界南鄉者多食粵鹽南鄉自羊牯取以上廣袤約百里多食江西與永興安仁轉販而來之粵鹽北鄉自北盛倉以上謂之上北鄉其地廣袤百里餘地均界平江多食城鹽北盛倉以下謂之下北鄉多食長沙省河之鹽西鄉與縣城一帶至省河一水相通程途較近時有以土貨赴長沙靖港兩處易鹽該兩處併計每年約銷二十八票有奇是食淮鹽者半食鄰私者亦半臣體察情形貧賤食私因屬情理會近圖達亦非人情該處於現由販運淮鹽之外尙可酌加一十六票每票五百引照案繳票費庫平銀一萬兩由新舊商人各半分認茲據兩淮運司江人鏡湖南督銷局道員方順鼎分別招商認足票價均據收

齊其計庫平銀十萬兩於公項不無裨益一面飭令督銷局設立分局實力疏銷惟目前開辦伊始銷數未能驟增所有新加之十大票應歸通岸統銷仍俟日後暢銷如每年銷至三十票以外則是新票各商辦有成效應除三十票外其餘增銷之票均歸新票運銷以爲認真開岸者勸新加之引歸入綱分與舊引一律拉售三綱之內免予輸捐在舊引無估壓之虞在新票獲轉輸之益商情均各翕然所收票價庫銀十大萬兩現因海州贛榆一帶兵力太單擬募三四營以資防守卽由此項票價銀兩留作餉費之資下戶部知之○甲辰鄧華熙奏 前准戶部咨光緒二十四年十月十五日奉 上諭現在京師制錢短少亟應推廣鼓鑄各直省近年多有開局鼓錢之舉各督撫一體查照辦理其分兩以每文八分爲準務令銅質精純輪廓完好不得以脆薄模糊之錢攙雜充數各省已經設局者速卽開爐鼓鑄未經設局者卽行查照舊章一體開辦等因欽此咨行到院當卽恭錄行司據藩司詳數籌辦爲難情形咨覆戶部旋奉接准部咨此次推廣鼓鑄制錢係奉 諭旨開辦令自行奏明辦理等因又經 臣行司妥議詳辦去後茲據布政使湯壽銘詳稱 國家議立開法內外利用交資邇來錢少價昂民生多困自應懷遵推廣鼓鑄以便流通惟安徽自設行省以來查無鑄錢成案尙未設有爐廠亦無辦過舊章章程可於內地省分咨詢以資參酌爐廠必須籌費建造已屬艱難加以購置機器採辦銅斤在在需資統計共鉅現在司

庫欸項支絀異常一切撥解支用要需尙且難於兼顧再辦鑄錢之舉財力實不能支况近年銅價騰貴制錢分兩雖定爲每文八分而仍不敷工本勢必更滋折耗亦非所以慎重度支轉輾籌思實難設法最辦惟有暫行請緩以俟庫欸稍充再行體察情形酌議舉辦等情詳請具奏前來臣詳細察核委係實情當此公欸甚難籌議設想則建經費無出一時難以舉行相應據實奏明請俟庫欸充裕再行酌議遵辦得旨知道了著俟庫欸稍充卽行酌議舉辦

東華續錄

光緒一百五十六

臣朱壽朋敬編

臣沈彭年恭校

九月丙午朔諭軍機大臣等翰林院侍讀學士瑞洵奏奉天地方積弊太深亟宜力求整頓擇尤臚舉并據管見一摺奉天爲根本重地從前積弊甚深迭經諭令該將軍等隨時認真整頓該侍讀學士所陳飭吏安民練兵清訟治盜開礦培才籌防八條及團練一事悉屬切要之務所擬辦法均不爲無見著李秉衡會同增祺懋詳察情形悉心籌議分晰具奏另片奏程萬里一案情節較重請提京審辦等語此案業經刑部議駁是否實有窒抑並著李秉衡增祺懋確切查明據實具奏毋稍徇庇原摺片均著鈔給閱看將此各諭令知之○丁未歲本年夏秋以來雨澤愆期近畿一帶旱象將成疊經設法祈禱以冀渥沛甘霖惟是應天之道以實不以文朕躬內省深懼未克感召天和輔弼匡襄實惟爾臣工是賴在廷諸臣其各獻忠忱共抒謏論庶幾上下交儆修人事以迓天庥○己酉祈雨遣載漪詣大高殿恭代行禮○庚戌諭近日設壇祈雨未霽甘霖繼繼旱象將成實深寅畏爰詔在廷諸臣各抒謏論冀迓和甘因慮應天之實首以恤民爲本意者畿輔訟獄之未清歟追呼之不免歟吏治不修民生日感何由感召天和

審刑部步軍統領衙門順天府尹五城御史直隸總督嚴飭所屬清理訟牘易結者立予斷結其未結案犯如株連羈候者一律分別取保釋放所有監押各犯獄官尤宜隨時查察毋任禁卒凌虐應發寒衣口糧等項錢文務令實惠均沾勿許剋扣至本年下忙錢糧尙屬中稔者不容飾災捏報其秋收歉薄之處應卽分別蠲緩地方官吏匿災不報卽行撤參至於積穀原爲備荒而設宜籌辦於豐稔之年不宜至待賑之秋勸捐擾累所有直隸勸辦積穀除已交者不計外其有未捐及已捐未交者一概緩至明年麥秋以後再行體察情形酌量舉辦本年勿庸交納用示朝廷上體天心下紓民力之至意○諭軍機大臣等祿祥奏科布多參贊大臣寶昌辦理張子全命案聽信司員賄竊而杜爾伯特旗索賄銀數千兩並將理藩院章京缺使麟鎬充補又有盜賣軍糧放差納賄及採買米麵多方阻撓並藉端不給兵丁獎劄等事請飭嚴查各摺片前因貴恆等代奏祿祥呈稱司員賄竊與寶昌交往種種賄情形曾經諭令貴恆等查辦貴恆旋卽交卸未及覆奏著連順到任後卽行按照先後指參各節確切查明從嚴參辦毋稍徇隱原摺片均著鈔給閱看將此諭令知之○諭州縣爲親民之官牧養小民責在州縣訓教州縣責在上司古人先學爲政而後入官今則入官而後學爲政嘗有任吏數十年而公事一無所知者吏治安望有起色耶今後大吏當以師長自居視屬吏如子弟先教以端趨向再教以習科條委以撥審試其能折獄

吾界以各差試其能了事否上司事事考究屬吏自人人奮興若大吏漫無教督一味徇私屬吏習於鑽營惟知自利其究必歸於害民而止追其害既著而以一劾了事推原本始大吏豈得謂無過耶官場風氣最易轉移各牧令以官爲家誰甘自棄爲上司者誠能整躬率屬示以一定之步趨就我範圍卽令久任玩視民瘼立予撤參屬吏未有不畏服者但恐不能正己以正人耳督撫用人固不可偏私尤不當拘之以要在於持公道而其本在於順輿情要當始之以訓教繼之以考察終之以舉劾庶於吏治民生皆有裨益將此通諭知之○諭人臣事君之道要貴勿欺朝廷孜孜求治大小臣工或條陳時政或申明勸章一善可從無不詔令通行責成各疆臣實力興辦但各直省情形不同卽一省之中各屬之情形又不同宜於東南者或不能行於西北宜於通都者或不可施之僻地其可行者自當切實奉行而實有窒礙者卽當剴切陳奏朝廷曲體民艱未有不洞鑒者無如各疆臣狃於積習凡有奏行交辦之事其不能行者默無一言但以敷衍了事其能行者百無一效亦以敷衍了事朝廷以股肱耳目相寄而諸臣以因循欺飾相報受恩深重者何忍出此嗣後遇有通行諭旨交辦之事當行卽行勿許畏難苟安其不能行者卽將實有窒礙之處直陳勿隱倘再因循敷衍遇有諭旨通飭之事並不實心舉辦使朝廷實事求是之意盡成紙上空談各該督撫等不惟有愧於心恐亦難辭重咎也將此通諭知之○前兩廣總督李瀚章

卒賜卹如例○辛亥欽奉 慈禧端佑康頤昭豫莊誠壽恭欽獻崇熙皇太后懿旨現在節近冬令京師貧民禦寒無資殊深軫恤著賞給銀一萬兩由內務府廣儲司發交順天府五城專備製辦棉衣分別散給以示嘉惠窮民○諭軍機大臣等有人奏江蘇辦理 契稅及年遠田產奇案擾民請比照清賦辦法明定年限一摺蘇省整頓稅契原以剔除中飽隱匿之弊惟該省曾經兵燹各屬情形不同若如所奏該官吏辦理 事宜追究及從前數百年之產業不但擾累民生且亦無此政體著劉坤一鹿傳霖妥定章程酌立年限總期裕國而不病民如有不肖官吏藉端勒索騷擾並著隨時嚴查懲辦以安民業原摺均著鈔給閱看將此各諭令知之○陶模奏甘肅固原州所屬海城縣地方漢民少而回民多回民悍性又反覆無常素稱難治光緒二十一年忽有戕官劫獄之變經官軍剿撫軍定後以當時逆匪未盡伏誅恐其漏網復萌故志故奏請搜緝餘匪一百餘名悉行正法懲辦不可謂不嚴詎本年六月十七日晚有回民馮老八馬三水聚集匪黨一百餘人頭裹白布包巾手執白布旗號分持火鎗刀矛從該縣屬大溝門鄒家堡焚殺起手希圖大舉經海城縣徐光興鹽茶營都司楊振清景字前旗管帶呂登科一面會帶兵役前往捕拿一面稟山陝西固原提臣鄧增轉電到關臣卽電覆提臣迅速加派隊伍前往剿辦正值夏麥收穫之際工作遊民在彼覓食者眾勿任裹脅滋蔓致難收拾復飛飭附近各屬地方文武一律

派隊堵拿其時該逆匪等已將鄒家堡牆攻破搶掠銀物焚燬房屋傷斃數人出由蕭家灣入兌坪草廠等處沿途焚殺幾成燎原之勢臣派練軍步隊幫帶洪隆廷練軍馬隊哨弁馬觀成各率所部兵勇會剿並飭卽永清率所部遠在右旗山北路馬廠一帶攔頭迎擊派練軍馬隊幫帶朱柳林率所部繼之再調駐防靜甯之景字左旗馬隊陳正魁率所部馳往策應旋據昌登科報稱十八日率所部景字前旗步隊會同豐泰營及縣役紳民李文道等山關橋堡一帶前進十九日行抵麻家坪遇賊賊卽開鎗抵拒我軍亦鎗礮環擊哨弁賴鴻章奮勇上前陣斬賊目一名賊勢不支退奔山上乘勢追殺鎗斃悍口數名奪獲旗械馬匹多件天已昏黑收隊駐紮哨弁賴鴻章身受矛傷勇丁帶鎗傷者二名是夜賊忽偷遁次日卽永清率所部遇賊於雙河堡卽督隊急進賊亦列陣援仗卽永清生擒兩賊鎗斃多名奪獲馬匹刀矛多件時值洪隆廷馬觀成朱柳林陳正魁昌登科等各隊齊至賊卽披靡敗走我軍分途跟追至司瓦溝等處不復見賊而沿途拋棄賊械馬匹甚多知已紛紛散匿查該匪等多係海城本籍卽有籍隸他屬者亦寄寓海城爲年已久該處山深地僻最易潛藏若不搜拿嚴懲淨絕根株恐兵退後出仍復擾害地方臣與提臣往返電商令該處公正回鄉作爲眼線隨同弁勇四處查緝復懸立重賞指名拏獻庶真犯得以誅誅良回不致波及旋據各旗管帶及地方文武選派兵役協同回鄉先後報獲僞元帥馮老八卽馮百

潮僞坐帥馬三水等首從共四十餘名電囑提臣飭委固原直隸州會營審訊據逆首馮老八供海城縣回民白封爲元帥馬三水供固原州回民白封爲坐帥均認同謀造反糾約黨類發給白布包山白布旗號分攜火鎗刀矛先從素有仇隙之鄒文典家破堡焚掠搶劫起手一面裹脅人衆再圖大舉不料山蕭家灣等處一帶刼殺後裹脅無多遇官兵兩次打仗失利同黨漸漸拋棄械物各自逃散伊等看大事難成也就跑了逆夥田文富等均供認聽從謀叛沿途放火殺人刼搶後與官兵打仗不利大家都各逃散是實各等供據此提臣電商臣以該逆首馮老八馬三水起意謀反結黨焚殺實屬罪大惡極應卽凌遲田文富等隨從謀反焚殺實屬法不容誅應卽正法均就近在固原地方隨時處決一併傳首殲示以快人心而寒賊膽經提臣先後照辦電覆在案並將處決首從各犯姓名年歲籍貫開具清單恭呈 御覽其餘除被脅勉從業經解散應請免究外並著名在逃各犯田白連等仍飭設法嚴拿務獲另辦總期不留餘孽以冀遏戢現在地方尙屬安堵堪以上慰 宸系臣查此次海城回逆滋事變起倉卒一日夜焚殺數村莊勢若燎原幸賴提臣籌調迅速悉協機宜各將士踴躍赴功不數日間元惡授首餘黨駢斬不致蹂躪蔓延辦理實屬勤奮提臣鄧增官職較崇臣未敢擅擬其應如何獎敘之處伏候 聖裁其餘出力文武員紳亦經提臣開摺註明實在勞績請保官階咨送到臣經覆核實無冒濫理合照繕清單恭呈

御覽仰懇 天恩俯准給獎以示鼓勵得 旨覽奏已悉辦理尙爲妥速鄧增著傳旨嘉獎其餘所請

獎敘著該部議奏○癸丑 上御儀鑾殿俄羅斯國使臣參贊等十一人覲見○諭近年沿海各省通商以來多有華民出洋貿易雖淹留海外而其心恆不忘中土忠愛之忱殊堪嘉尙前經諭令沿海各省於海外華民貿易回籍時設法保護不准關津胥吏及地方莠民藉端苛擾國家屢念民依無微不至其貿易海外商民並著各出使大臣隨在妥籌保護用副朝廷懷保吾民在遠不遺之至意○乙卯欽奉 慈禧端佑康頤昭豫莊誠壽恭欽獻崇熙皇太后懿旨禮部具奏萬壽聖節禮儀一本所有本年十月初十日萬壽著在皇極殿行禮○諭各部院衙門奉旨交辦事件本有例限乃近年迭經降旨申諭不准任意延擱當此時多艱朝廷宵旰憂勤孜孜求治該大臣等自當仰體此意振刷精神益加整頓不容稍有疏懈嗣後各部院衙門遇有交議之件均著查照定章迅速議奏倘逾期不行奏覆一經查出定將堂司各官一併懲處以儆玩泄○以董履高爲直隸鎮定鎮總兵武玉書爲貴州鎮遠鎮總兵○丙辰劉家模奏 臣恭查光緒二十四年十二月十六日奉 上諭各省地丁漕糧尙有定額例准折錢交納原爲便民起見惟近年銀價日落錢價日漲在民照常交納在官益多盈餘以致正供所餘悉歸中飽殊非體恤民艱之意著各將軍督撫嚴飭藩司糧道查照本省銀錢通行市價將丁漕糧米照市價折錢若干以錢合

銀均按庫平庫色爲斷每年酌申奏定數目徵收以歸畫一如有不肖州縣巧立名目藉端浮收卽著從嚴參辦將此通諭知之欽此仰見 皇太后 皇上訓詞剴切並懇懇愛民之至意各直省大吏果能實力奉行民困何患不蘇積弊何難驟革乃自欽奉 諭旨後又歷經上下兩忙各省認真辦理者甚少所見之覆奏者或藉口於舊日已減或附會於原納本輕或稱隨時隨地銀價不同或謂路途遠路近解費不等無非設詞抵藉以一奏塞責近惟山東直隸兩省辦理尙屬認真似可爲諸行省之倡獨河南興畿輔接壤迄今未聞辦有頭緒州縣仍相沿舊例大肆浮收竟無人過問查河南徵收舊章凡丁漕全數徵銀並銀錢兼徵之州縣約十之二三而全數徵錢者則十之七八每額徵銀一兩計折納制錢二千六七百文至二千七八百文者比比皆是而省南之州縣如信陽羅山正陽等處竟有折納至三千文以上之多者又創其名曰規錢糧分錢補數千底錢辛工紙張錢按糧數多寡正額外復遞有增加在錢賤銀貴之時官入盈餘幾可與正供相敵方今外省銀價按庫平每兩合制錢一千二百文其加於庫平地方市價亦止一千三四百文核計所餘之數更浮於正供之數雖曰民力輸將並無加於常數之外然近日制錢缺乏農粟女布民間之變值尤難錢貴仍令照常數納錢不加猶之加也說者謂民納錢而官解需銀或至一時接價不知一州縣之地制錢幾何而開徵徵錢以十數萬緡計鄉閭搜括盡所有以納於

官不足尙賴鋪戶錢帖相輔而行現錢既盡歸官市面益難播挂惟有將銀賤值出售有司轉自居奇取巧安有操價之事哉甚有狡猾州縣探知某處銀賤輒勒派差車運錢出境尤違例取巧之甚者也前撫臣劉樹堂議覆御史李耀英條陳摺內因請提州縣盈餘銀十萬兩爲還洋欸之用夫以額徵加倍之銀價按全省丁漕折納數目計歲入浮餘不下三百七八十萬兩提欸不及百分之三而令有司以餘羨歸公爲舊制撫臣遂置劉明民營於不問更使州縣明目張膽並有以提欸照每兩加制錢五十文轉徵之於民者其爲厲孰甚焉上尤有慮者河豫爲近畿門戶比歲歉收民情浮動向皆苦於橫徵莫敢控告今聞奉有 恩諭孰不含情待澤冀求輕減於晨時若有司仍我行我法悍然不顧設有奸民乘隙糾合抗羈斯時以重法繩之必激成民變其害有不可勝言者擬請 旨飭下河南巡撫迅即遵委委員分投各屬確切查明向章某州縣徵銀某州縣徵錢每兩交納實數若干分晰開單奏報可否仿照直隸山東成案酌量適中去省較近者每兩折交制錢以二千一二百文爲率遠者以二千二三百文爲率如提前項盈餘每兩酌加錢五十文至多統不得過二千四百文仍准銀錢並納其願納銀者每兩照庫平庫色准加徵銀四錢零統不得過五錢向納不及此數者免議並請 飭裁汰一切陋規名目不准藉端浮收其零碎糧戶納錢者一律照章核算不得任意加增如此酌中釐定既爲州縣寬留有餘亦可爲 國家稍

補不足而小民亦並沾實惠矣 上諭御史劉家模奏豫省丁漕折價過重請旨切實核減一摺州縣經徵錢漕屢經諭令各直省督撫嚴飭所屬按照現時市價大加核減不准仍前浮濫若如所奏河南州縣徵收錢糧竟有折價至三千文以上者似此任意浮收殊屬不成事體著裕長確切查明分別酌中定價不准巧立名目額外加增以蘇民困而肅吏治○丁巳以韓洪達爲湖南衡州鎮總兵○戊午諭御史張荀鶴奏東海關苛斂出洋華民請飭酌議定章以除弊政一摺各省出洋華民前經降旨一律設法保護不准關津苛擾茲據該御史奏稱山東登萊等府民人出洋謀生東海關道於給發護照時每年收取筆墨等費爲數甚巨窮民受累不堪殊非朝廷體恤商民之意著裕祿毓賢轉飭該關道妥定章程嚴行裁減並出示曉諭如有吏胥人等影射苛斂卽行隨時懲辦以保商旅而杜侵漁○毓賢奏黃河治法誠如部臣所云無論治標治本總以展寬河面盤築堤身疏通尾閘三事最爲扼要之策查尾閘之害以鐵板河爲最全河挾沙帶泥到此無所收束散漫無力經以風潮膠結如鐵安望暢流不暢則出路壅出路塞則橫溢多故無十年不病之河現擬建築長堤直至淤灘用椿硬鑲如水中作工之法再設法防護風潮縱不能徑達入海而多進一步卽多收一步之益至於堤埝卑薄固由風雨剝殘車馬踐踏亦由從前修培之時土方未必足夯硤未必實其防汛者又祇知水來搶堵不知固其根基甚或起後戢之土壓壅壩

之面此卑薄者所以積久彌甚也今擬修培時土方必足夯峨必切實做工不准稍涉草率修培之後尤宜加意保守其坐灣之處一灣一險如上游之賈莊孫家樓中流之桐家岸霍家溜桑家渡下游之白龍潭北館家集鹽窩均著名巨險其餘險處甚多此固非裁灣取直不可然亦須相度形勢如坐灣過大引河工長上口無收吸之勢下口直逼衝岸則去一險復生一險必引河上口能迎溜勢下口直入河心既可避無數險工又不致顧此失彼方為得計如蒲臺通西魏家口起至通東之宋莊止約長四十里河水分流納正河之溜三分之若就勢修堤建橋挑溜則蒲臺北岸之北鎮宋家灘宋家集一帶減去險工甚多將來溜歸北河正河如淤蒲臺城垣永免水刷之患此裁灣取直之最有利益者擬即勘估興辦其餘再相機辦理要之辦工貴在得法而立法先期除弊河工積弊之深一言難罄而土損國帑下病民生二語足以括之茲飭總辦河工督糧道尙其亨會同三游督辦之員嚴飭在工文武員弁凡從前虛報積險侵食土方種種弊端一律掃除實料定准萬斤按時價發給價錢既足再有減色立予嚴懲防汎及承修各員酌添局費以養其廉經費既添再有不實立予嚴參蓋弊除而後法可行法行而後害可除得旨知道了卽著嚴飭在工員弁認真修防如再有種種弊端立予嚴參懲辦○庚申祭 歷代帝王廟遣魁斌行禮○辛酉 大高殿設壇祈雨○諭前因有人陳奏東南各省從前辦理軍務時曾有抽收房捐之

議現在需餉孔殷似可仿行常經諭令兩江湖廣閩浙兩廣各督撫體察情形如能有益於國無累於民
卽行妥定章程奏明辦理惟查抽收房捐乃係軍務時不得已之舉此時東南各省商務未興民力尙困
深恐地方官吏辦理不善轉滋騷擾殊非朝廷體恤民艱之意所有東南各省籌辦房捐之處均著一律
停止○賞給同仁廠米石○以王恆爲奉天府府尹○以陳垂滋爲貴州按察使○以清銳爲盛京刑部
侍郎景灃爲理藩院左侍郎○弼良奏查殺虎口每年應徵正課盈餘額稅銀共四萬四千四百零五兩
零二分四釐從前稅源暢旺額徵足數近十餘年來正額無虧盈餘短徵多至一萬八千餘兩少亦一萬
一千餘兩歷經管稅各員任滿奏報並准戶部片奏本年更換殺虎口差臨期驗看不到者竟有十一員
之多素稱優渥今乃視同畏途則該關近來虧短喫重情形已可概見應繳短徵盈餘銀兩按案議令減
四成並請免予議處等因於光緒十一年八月十二日奉 旨依議欽此欽遵在案光緒二十四年十月
奴才奉 命管理殺虎口稅務任事以來悉心體察短徵情形約有數端一因城毛皮張稅洋商執持照
單按約免稅一因進口羊羣稅繞越殺虎口關徑由歸化城赴張家口一因綢緞稅暨出口甄茶稅現俱
繞越殺虎口關山草地徑運歸化城出口卽此四宗侵削微額歲以萬計此外病課之端有二一邊牆偷
漏東西邊牆毗連山西陝西兩省自新平至神木共邊口三十九內大關得勝口河保營黃浦川等四處

抽收沿邊出入牲畜貨物稅課其餘各口向不設局而例禁貨物出入所以杜繞越防偷漏也惟邊疆遼闊道路紛歧丁書巡役不敷分布全恃守口弁兵沿邊州縣協同巡緝乃日久弊生弁兵巡緝不嚴甚者得賄賣放州縣禁緝不力甚者託詞徇庇其意謂不曾設局之口卽不當以偷稅論罰殊與例意相背而禁止出入之口轉爲商販走私之途一陋規侵佔向因文武各官有協同巡緝之勞分季致送數十金不
等名曰季規各局丁書巡役本有工食又於正課內提出三成均分名曰批費稅署所需器皿書役託詞供應任意開銷名曰安設解交戶部工部錢糧規費尤鉅其餘濫支之款瑣屑難以枚舉要皆侵蝕正課者也從前稅收暢旺原可稍沾餘潤今則正課尙且不敷安可坐視漏卮因而不改奴才抵任後體察情形將季規批費安設部費等項卽悉數革除力求撙節凡關正項錢糧儘數入庫非照例應銷之款不得動用緣此綜計裁汰之數約在六七千兩之譜此奴才力所能及者也惟邊疆延袤一千二百餘里丁役遠出查拿奸商恃眾往往抗拒有時拿獲交地方官審辦則謂經過邊口並無稅局難以偷漏論罪非徑行釋放卽延不解關以是拿不勝拿禁不過禁禁查雍正十二年二月初六日奉 上諭直省關稅監督於地方官不相統轄一切呼應不靈而大小口岸甚多監督一人勢難分身兼顧嗣後凡有監督各關著督撫兼管所屬口岸飭令該地方文武不時巡查如有縱容滋擾情弊聽督撫參處至監督徵收稅課及

一切應行事宜亦應聽督撫節制如此庶幾有專司仍無歧視等因欽此同治二年十二月十三日奉
上諭殺虎口監督俊達奏請嚴禁奸商繞越由地方官協查並禁東西邊口私行出入貨物各一摺殺虎
口徵收稅課向以邊牆及黃河爲界近年各邊守口弁兵多不在彼值班稽查以致奸商屢有繞越偷漏
之案實屬玩愒著沈桂芬張集賢轉飭所屬文武地方官自殺虎口起東邊一帶至新平口西邊一帶至
陝西神木口所有私行出入貨物牲畜均著嚴行禁止並飭守口弁兵常川駐守實力盤查毋得仍前玩
忽餘著照所議辦理等因欽此奴才查照成案當於抵任後恭錄 諭旨咨呈山西巡撫陝西巡撫欽遵
轉飭在案無如沿邊地方文武久已視爲具文賄放縱容弊難驟絕惟有籲請 明旨申明定章始收實
力奉行之效此繞越偷漏之亟須嚴禁者也又包頭鎮進南之皮張藤油等貨水運進口者在河保營納
稅陸運進口者在黃浦川納稅乃山路逐漸開通商販熟諳捷徑近年俱改由孤山口外之沙梁運至陝
西府各縣行店轉發黃浦川稅局致同虛設徵稅以便商爲要與其懲辦於拿獲之後莫如就徵於蓄聚
之區前以殺虎口迤東邊口未設分局商民不便經戶部奏大同府屬得勝口准其開通聽商販運於乾
隆五十八年六月初五日奉 旨欽遵在案擬請援案將黃浦川稅局移於陝西府各縣地方在商民不
病行途而巡役勿庸連涉又有畿輔一帶至歸化城凡出口進口之貨向以殺虎口爲抽分正路歸關查

驗貨物執殺虎口照票者例不收稅執張家口照票者例不免稅歸化城茶莊金龍社以茶商承全裕由
草地移城票請究治經前任監督恩長從重懲辦在案查繞越張家口之羊羣因沿途水草蕃滋足資餵
飼繞出張家口之綢緞販茶因草地牛車運貨載重價廉商民稱便治商民以偷漏之罪其理順使商民
多費成本以違功令其勢難徒張示禁必至陽奉陰違多派緝私亦虞騷擾生事奴才再四籌思惟有於
歸化城就近抽收庶於整頓稅課之中尙寓體恤商民之意查崇文門稅務衙門因東壩之茶稅西行繞
越張家口咨行山西截留查辦嗣據茶商稟稱情願在口補交東壩稅銀經崇文門監督於同治元年正
月十四日據情奏明委員前往張家口補收東壩應徵稅課今繞越殺虎口之羊羣等稅與繞越東壩之
茶稅事同一律擬請援案由歸化城木稅房就近抽收俾原有之稅漸次規復又殺虎關吏役向視監督
如過客敢於侵佔把持奴才視事後擇其尤無狀者嚴懲一二以冀挽回病習每月收數比較往年有贏
無絀再加裁汰之六七千兩按照通年應徵定額可不至如前虧短以上奴才籌擬各條倘蒙見諸施行
不敢謂成效速著一二年後辦理得宜似可涓滴歸源日有起色正擬恭摺具奏聞光緒二十五年六
月初四日奉 上諭各省關稅釐金鹽課積弊太深亟宜力籌整頓等因欽此由戶部恭錄飛札遵辦前來
伏維頻年虧短盈餘久荷 聖明洞鑒是殺虎關情形與他處不同中飽陋規之病猶輕而繞越偷漏之

弊爲重至於酌提歸公亦須遵辦足額之後目前補救之法惟有力求整頓據實奏聞合無仰懇 天恩
俯准將繞越之羊羣編緞甄茶等稅援崇文門成案山歸化城木稅局就近抽收將黃浦川稅局移設府
谷縣城以期無礙商情有裨稅課並請 旨飭下山西巡撫陝西巡撫嚴飭沿邊文武地方官遵照舊章
實力協查毋得串通暗放拿獲漏稅卽行解關究治毋得縱容徇庇如有前項情弊一經奴才咨會認真
分別究懲以儆效尤如蒙 俞允府谷縣稅局卽由奴才籌款移設免其造冊報銷所遺黃浦川一局留
以稽查左近各員實於稅務大有裨益下所司議奏○癸亥賞五城粥廠米石○甲子諭軍機大臣等李
秉衡奏奉天仁育兩軍尙未築有營壘散漫無歸請飭趕緊營壘等語著增祺體察情形擇定扼要之地
督飭該署統領迅速分駐營壘俾兩軍駐紮各成重屯隨時訓練以備緩急務使聯絡一氣足壯聲威再
勿延誤原摺著鈔給閱看將此各諭令知之○以端方爲陝西布政使馬相如爲陝西按察使○丙寅奎
俊奏據日本國陸軍大尉井戶川辰三兩稱奉本國政府之命來川請派文武官員選擇學生遊歷日本
考察學制並稱該國練兵之期約在中歷九月請於七月遣員前往等語查川省中西武備各學堂建設
未久風氣未開日本所設學校以及練兵諸法多係仿自泰西既經該國派員來川一再陳請未便卻其
敦睦之意惟學生驟難其選擬先酌派文武各一員咨送出洋將該國學制兵制詳細考究仍令回川以

廣見聞而備採擇隨經奴才咨經總督並覆并戶川辰三在案茲委道員沈翊清提督丁鴻臣定於本年七月出洋前往每員給銀二千兩以爲往返一切應用之費飭據藩司王之春在於本省庫金項下動支事後作正報銷下所司知之○丁卯以何秉康爲陝西河州鎮總兵○戊辰剛毅奏奴才在上海行次欽奉 電行廣東地大物博經臣工陳奏各項積弊較江南爲尤甚如能認真整頓必可剔除中飽籌出鉅款剛毅曾任廣東巡撫熟悉地方情形著卽督同隨帶司員即日啟程前往該省會同督撫將一切出入款項悉心釐剔應如何妥定章程以裕庫款之處隨時奏明請行辦理等因欽此欽遵當於八月初五日行抵廣東省城業經電奏在案抵省後與督 譚鍾麟疊次會商飭取通省各局所收支數目清冊逐一句稽悉心查覈伏念粵省素稱財賦之區乃覈其度支清冊幾於入不敷出推原其弊無非由於糜費中飽與江南大致相同而所以汰糜費杜中飽之法則不能盡同查該省歲入之款以釐捐爲大宗弊費之多亦以釐捐爲最甚官場習尚奢華需次人員日用不貲一得釐差則以爲取償之地浮銷局用任意分肥積習相沿牢不可破此弊之在糜費者也收數之衰旺無定比較之多寡有定但使勉數比較無礙考成往往減折招徠收多報少必鑿其饕餮而後已此弊之在中飽者也從前屢經各督撫 裁節局廠經費本年督 譚鍾麟復派委員赴河口等十丈廠查辦革除陋規酌加比較凡糜費中飽之弊固已多

方禁止而所擬增比不過十餘萬兩各委員已覺十分竭蹶奴才詳加參酌欲整頓釐務非改弦更張另籌辦法不足清積弊而塞漏卮當經督飭現辦釐務總局本任雷瓊道馮光道通盤籌畫更定章程一面遴委開復總兵黃金福候補知府多齡體察官商情形會同詳議稟覆由奴才覆核辦理務令涓滴歸公集成鉅款上有益於國計下不病夫民生以期仰副深宮宵旰焦勞之至意報聞○辛未以馬玉崑爲浙江提督○以張國林爲山西太原鎮總兵○癸酉以宗人府增刪則例告成予禮親王世鐸等獎敘有差○甲戌諭劉家模奏五城盜案日多請編查保甲一摺京師地面遼闊奸宄最易藏身近令添設保甲稽查匪類原期安靖地方乃強劫之案仍復層見疊出總因盜賊未清緝捕不力所致釐嚴重地盜賊肆行無忌尙復成何事體著保甲局步軍統領衙門順天府五城實力整頓遇有盜案務令勒限緝獲並令練勇合力捕拿毋任漏網至各營統領營官隨時認真查察勿稍玩愒

冬十月乙亥朔時享太廟遣溥靜恭代行禮○丙子以世鐸爲內閣學士兼禮部侍郎銜○丁丑剛毅等奏剛毅抵粵即將籌辦各項大略情形於八月十四日分別具奏後檄調在省印委各員來轅告以深宮宵旰憂勞無時不以度支匱乏爲慮大小臣工凡有血氣者皆當抒急公奉上之忱將所耗冗費竭力撙節所得盈餘量力報効以濟帑藏之不繼嗣據各印委等先後開摺呈報前來臣剛毅督飭隨員

詳加察核次第鉤稽查廣東歲入之款地丁耗羨鹽課雜稅四項共銀一百九十餘萬兩 國家維正之
供取民有制不能率議更張此外入款以釐捐爲大宗而善後局則爲通省出入總匯之所業由臣鍾麟
於八月二十六日據實開單專摺奏報在案統計正雜入款歲約銀五百餘萬兩出款亦五百餘萬兩經
疊次裁減以入抵出尙恐不敷往往移緩就急藉外銷之有餘補正項之不足現當時事艱難部庫支絀
苟有可汰可省之款卽當勉爲設法若不於各項盈餘各項冗費中悉心綜核竭力籌措何以仰副 朝
廷愛國憂民慎重庫儲之至意臣鍾麟臣德壽節次商酌擬將釐金加增比較銀二十一萬九千
四百兩酌提加增釐金經費銀二十三萬兩商捐土絲土茶費銀二十二萬七千兩茶膏商認繳牙餉十
二萬兩節省各局廠用項銀五萬三千七百二十兩計每年在釐務局共籌銀八十五萬一百二十兩又
善後局各項節省用款銀三十萬三百兩零酌提歸銀盈餘銀十萬兩計每年在善後局共籌銀四十萬
三百兩零又運庫節省外銷修倉等款銀十二萬二百兩零鹽務各差各缺酌提盈餘銀八萬四千三百
兩計每年在鹽務共籌銀二十萬四千五百兩零又督撫藩司各衙門酌量節省公費銀五萬三千六百
兩各府縣十二優缺報効銀十萬兩計每年在各衙門共籌銀十五萬三千六百兩統計庫平紋銀一百
六十萬八千五百兩零均係出自外銷及新舊加增節省盈餘等項絲毫並未加收於民應自光緒二十

五年十月起一律專款存儲聽候部撥臣剛毅前奏撥務非改絃更張不足以除積弊當經商同臣鍾麟議歸商人包辦以杜中飽而節糜費惟事屬創始必須七十二行承辦之商重公正殷實方可有利無弊且既辦之後仍須地方官隨時妥為保護方能垂之永久斷非五六月所能集事創始稍涉草率竊恐欲除積弊未去而新弊又伏臣等往返籌商撥捐商包一節先飭司道澈底清查由臣鍾麟等妥核詳議再行奏明開辦惟是粵東地濱重洋界連邊徼凡練兵籌防詰奸緝匪在在均關緊要況比年以來盜賊充斥若不為該省酌留餘地萬一倉卒有事竊恐難以措手亦非綏靖海疆之道臣剛毅與臣鍾麟通盤籌畫不敢竭澤而漁庶上有裨補國計下不至貽誤地方上諭剛毅等奏整頓撥捐鹽務及裁汰冗員酌提盈餘一摺廣東地大物博前經諭令剛毅馳往會同該督撫等妥籌鉅款以濟餉需茲據奏稱先就現在情形籌出常年軍餉銀一百六十萬餘兩均係取自外銷及新舊加增節省盈餘等項並無絲毫加取於民即著自光緒二十五年十月起一律專款存儲聽候部撥國家慎重度支首在撙節糜費嚴杜中飽果使悉心綜核自能有益於國無損於民該督撫尤當通飭所屬實力奉行更不得以此藉口多方設法取償以致累商病民轉滋流弊○諭增祺等奏查飭估福陵前碑樓等工請擇吉興修一摺著欽天監於本年十月內選擇吉期行文增祺等遵照敬謹興修以昭慎重○辛巳諭近來各省貧民生計維艱

經諭令各督撫飭地方官查明如有開荒可墾之地務令一律開墾未據各省奏報定有切實辦法明
廷軫念民艱務使戶有儲藏地無遺利並非專爲清查荒賦起見著各直省督撫飭地方官確切查明
各該省開荒地畝實有若干剴切曉諭民間盡力墾種但期民生有濟其應行升科之處寬予年限不必
拘定常例辦理各該督撫毋得視為具文一奏聖衷將此諭知之○壬午諭直隸提督聶士成刑部尚
書趙舒通戶部左侍郎立山嵩禮部左侍郎吳廷芬均著加恩在紫禁城內騎馬○許應鑾奏閩省礮山
帶海輪船往來之衝白鵝尾通商華洋雜處易生窺伺今則強鄰密邇防務益不可稍緩臣謹任將一
年於沿海險要詳加體察如福州之電光山廈門之胡里山等處礮皆粗具規模猶鼓浪嶼控制蓬澎
素無布置因與提督楊岐珍酌擬擇要建一堅臺山樞道阻邪召匠核實勘估約計工料共銀十餘萬
兩而安設巨礮尙須另籌近駐省會勇營改習洋操經臣認真督練整齊步伐業改鑄觀惟利械缺如
宜添置茲竭力籌款訂購僅得智利快鎗六百桿快礮九尊以備緩急實不敷用又省垣機器局臣委游
擊賴文華總辦該員請求西法夙擅巧思所鑄陸路小礮與滬製無異而礮車靈便尤能獨出心裁祇緣
該局狹隘異常且以製鎗彈之機易而製礮故程功紆緩欲充軍實急待恢張至於成造無煙藥及新式
鎗礮子等機尤應酌量增購蓋邇來行陣舍此無以制勝也綜計各項所費不貲閩屬瘠區實難策畫查

光緒十八年廈門礮臺置大礮案內經前督臣譚鍾麟奏蒙 恩准截留新海防捐銀兩以濟要需現待
欸愈殷由司道詳請援案辦理伏思此時捐項久成籌策綜核閩省報冊歲收不過幾千金杯水車薪本
無大益特因閩民經商於外洋者多以居積致富平時襄助地方善舉皆好義急公今爲保衛桑梓廣行
勸諭捐輸或可期踴躍將來倘集有成數則一切防務固克次第舉行卽所得無多而以置新式鎗礮亦
稍裨大局 維時艱日亟非修明武備無以弭邊患而伸國權若終因陋就簡奚從自振無如度支匱乏
部欸既不敢請撥而閩省餉源奇絀又難掬俱第不得已特爲補苴之計如荷 聖慈俯准應請自本年
十一月初一日爲始予限三年所收新海防捐銀兩全數濟用一俟期滿仍另儲總候部撥以示限制而
杜虛糜下戶部議奏○戊子先是廣州附近有法國兵官爲游匪所戕法人以兵艦入廣州灣據之向我
政府要求租借爭議年餘至是欽差勘界大臣廣東提督蘇元春與法國使臣會議廣州灣租界約七條
成其文曰 第一款 因和睦之由中國國家將廣州灣租與法國國家作爲停船運煤之所定期九十
九年惟在其租界之內訂明所租情形於中國自主之權無礙 第二款 議定在停船運煤之界用以
守衛作運興旺等情所有租界內水面均歸入租界內管轄其未入租界者仍歸中國管轄開列於左東
海全島礮洲全島該島與東海島中間水面係中國船舶往來要道嗣後仍由中國船舶任便往來租界

之內停泊勿得阻滯並勿庸納鈔徵稅等事其租界定在遂溪縣屬南由通明港登岸向北至新吟院官路作界線直至志滿墟轉向東北至赤坎以北福建村以南分中爲界赤坎志滿新墟歸入租界黃略麻章新學福建各村均歸中國管轄復由赤坎以北福建村以南分中出海水而橫過調神島北近水面至兜離窩登岸向東至吳川縣屬西礮臺後面分中出海三海里爲界卽中國十里黃坡仍歸中國管轄又由吳川縣海口外三海里水面起沿岸邊至遂溪縣屬之南通明港向北三海里轉入通明港內分中登岸沿官路爲界此約訂明並繪圖畫明界址互相劃界分執後兩國特派委員會勘明確定界址以免兩國爭執 第三款 於九十九年期內所租之地全歸法國一國管轄以免兩國爭執又釐定租界內華民能安分並不犯法仍可居住照常自便不可迫令遷移其華民物業仍歸華民管理法國自應一律保護若法國需用物業照給業主公平價值 第四款 在租界之內法國可築礮臺駐紮兵丁並設保護武備各法又在各島及沿岸法國應起造燈塔設立標記浮橋等以便行船並添設整齊醫堂以利來往行船以資保護 第五款 中國商輪船隻在新租界內如在中國通商各口一律優待辦理其新租界各地灣內水面均歸法國管轄法國可立定章程并徵收煙船各鈔以爲修燈塔各項工程之費此係專指廣州灣內水面而言至碣東水面已在第二款內聲明 第六款 遇有交犯之事應照中法條

款訂中越邊界章程辦理 第七款 中國國家允准法國自雷州府屬廣州灣地方赤坎至安鋪之

處建造鐵路旱電纜等情應備所用地段由法國官員給價請中國地方官代給中國民人照章給與公

平價值而修造行車需用各項材料及養修鐵路各費均歸法國辦理且按照所定總分數目華民可得

鐵路電纜之益至鐵路旱電纜若在中國者中國官員應有防護鐵路車棧電纜等務之責其在租界者

由法國自理又議定在安鋪鐵路電纜所抵之處水面岸上均准築造房屋停放物料並准法國各商輪

停泊上落以便往來而重邦交此約應自書押之日起開辦施行其現由 大清國 大皇帝批准及大

法民主國大伯理爾天德批准後即在中國京都互換以法文為憑此約在廣州灣立漢文四分法文

四分共八分○已丑諭李秉衡增祺奏遵議整頓奉天捐費擬定切實可行條款一摺所陳飭吏治整頓

章正旗務賠錢法汰冗員清聖政飭礦課辦團練各條均屬切實可行在奉天尤為當務之急增祺身任

封疆責無旁貸即著按照所陳各節與地方官吏悉心核議責令逐條認真舉辦倘有糜費中飽粉飾因

循等弊務即從嚴參辦以挽積習毋得有名無實致負委任○庚寅以清銳為盛京戶部侍郎溥頤為盛

京刑部侍郎○以崇勳為刑部左侍郎○賞給通州王恕圖等喇嘛米石○庚寅諭軍機大臣等盛宣懷

奏條陳籌餉事宜開單呈覽一摺據稱加稅一事與各國屢議未成查咸豐十年新定通商稅則舊後條

約第一款載明應核作時價照值百抽五例徵稅現在金貴銀賤但須規定此一語將各口進出貨物稅則照時價另行核估自無所用其加稅現屆十年換約限期應及時與認真開議又近來外國菸酒藥料器皿等物中國銷路甚廣不盡各國官商自用應如何分別辦理之處請一併籌議等語各口關稅如照現在時價核估所增稅項實爲籌餉大宗著盛宣懷品級榮會同赫德查照條約迅速籌辦仍由總理各國事務衙門綜核辦理○癸巳諭軍機大臣等現在時勢艱難各國虎視眈眈必先入我堂奧以目下中國財力兵力而論斷斷無以自我開之理惟是事變之來實逼處此萬一強敵憑陵苟我以萬不能允之事惟有理直氣壯敵愾同仇勝負情形非可逆料各省督撫每遇中外交涉事件往往預存一和字於胸達至臨時毫無準備此等鋼習實爲辜恩負國之尤特嚴行申斥嗣後遇萬不得已之事非戰不能結局者如業經宣戰萬無即行議和之理各省督撫必須同心協力不分畛域督飭將士殺敵致果和之一字不但不可出諸口並且不可存諸心以中國地大物博幅員數萬里人口數萬萬苟能各矢忠君愛國之忱又何強敵之可懼正不必化干戈爲玉帛專恃折衝樽俎也將此通諭知之○以準良爲泰甯鎮總兵○甲午諭軍機大臣等有人奏疆臣任用私人玩視軍務一摺據浙浙江巡撫劉樹棠性情狠鄙素不知兵任用私人統領李福興等非其同鄉卽其戚屬聯絡一氣狼狽爲奸該撫悉委以重權處以要地致

與兩司頗存意見遇事偏袒飾台民應萬德開教一案奏報鋪張整頓海防諸事敷衍等語著許應麟
按照所參各節秉公查訊據實具奏原摺著鈔給閱看將此諭令知之○諭萬本敦奏江西鄉試積弊太
深請飭嚴定章程一摺鄉試為賓興大典科場條例立法最嚴若如所奏江西近年以來傳遞搶替弊端
百出甚至場前則拜房以通聲氣場後則換卷以為彌縫內外勾通成何事體著松壽安定章程嚴加整
頓務期破除情面弊絕風清用副朝廷慎重抡才至意○乙未增祺奏素天制錢缺少向賴憑帖周轉故
錢貴於帖奸民執帖向鋪取錢往往激成關閉由是鋪商皆相戒不復出帖而帖與錢竟至兩缺十數年
前弊已如是軍興以後補救愈難雖鼓鑄銀元行用官帖市面稍覺流通然無制錢輔助官帖仍以銀元
折算銀元之極小者每角亦七分二釐再小者三分六釐市塵零星貿易必盡數用之或多或少欲求數
文制錢互相找給皆不可得不獨市面不能流通而小民之恃力作賁販為衣食者其窘滯尤甚且各屬
情形不等銀元雖有定價究未能一律暢行以之搭放軍餉兵丁亦未免虧累前於五月間業已遵 旨
停鑄銀元取籌鑄錢以救目前之急昨於覆奏籌辦地方要件摺內先已陳明在案伏查上年十月欽奉
諭旨飭令各省推廣鑄錢其分兩以每文八分為准務令銅質精純輪廓完好自應欽遵辦理但關外
情形與內地不同工匠招自天津須優給工食物料購自外洋運費尤增現今銅價每百斤值銀三十二

兩鉛價每百斤值銀十二兩若照八分定制每千錢已需銀一兩有奇加以工耗運腳賠虧甚鉅又奉
省銀價高於關內幾及三分之一近來市上不見一錢者大抵多私運入關及奸民銷燬所致不有以清
其源則鼓鑄雖多終不敵銷去之眾利之所在竊起而趨賈誼所謂重刑不足以禁之者此也清源之法
惟有酌改銅銖則外溢私銷不禁自絕現在鑄錢每文擬以五分爲率銅鉛各半使銷燬者無利可圖然
後嚴其盜鑄販運之禁俾與銀元錢帖相輔周轉奴才前於五月間卽行試辦並由天津招致匠工上月
已經開鑄試鑄共鑪兩盤每日可出東錢一千六百餘吊現已鑄出三萬餘吊察看錢式雖不及機器所
造之精而無脆薄模糊等弊試在市面行使商民尙稱便利惟事關更改錢法未敢擅專合無仰懇 天
恩俯念根本重地民用維艱准予變通鼓鑄以蘇民困出自 逾格鴻慈謹將錢樣送山軍機處進呈
御覽如蒙 俞允奴才昨已預購銅鉛擬再加鑪鼓鑄然卽此五分而論核計工本尙須賠貼十分之四
五始足相抵所有現在試錢賠貼之款暫由奴才設法籌辦毋庸動支正款如所鑄已多賠款數鉅再行
另籌的款奏明作正開支以期經久再變通盡利尤貴因地制宜查奉天產銅之區已據查報不止一處
現在正值整頓礦務擬卽與金銀各礦一律開採果能以採爲鑄則來源既旺泉貨益資流通用副 朝
廷維持闡法之至意得 旨如所請行○內中諭著派大學士李鴻章爲商務大臣前往通商各埠考察

一切商務事宜○戊戌諭崑岡等奏會典館節省經費銀兩請解交部庫以備餉需一摺會典館提調官鴻臚寺卿那桐等辦理館事撙節銀六萬兩呈請繳還部庫實屬奉公潔已辦事認真所有節省銀兩著卽解交部庫○辛丑以劉永福爲河南南陽鎮總兵○壬寅允裕長奏予故河南南陽鎮總兵武朝聘照提督軍營立功後積勞病故例從優議卹事蹟交國史館立傳並於原籍及立功省分建祠○剛毅奏潮州地方自同治初年以來屢擬開辦釐捐迄無成議祇因地窄民稠土產無幾凡進出貨物經過潮府者有稅經過揭陽者有釐其至省城辦貨經過石龍白沙等處者有釐雖潮屬未設釐廠貨物均已抽捐若就地設卡重抽商力未逮必至滋生事端前兩廣總督瑞麟體察情形許其永遠免釐職此故也至潮屬汕頭洋人輪船寄泊之所往來貨物有用三運單者有歸洋行貿易者本地出產無多若添辦釐捐更恐生意盡歸洋行弊端自出揆之裕課通商兩無裨益奴才奉 命來粵籌餉該處紳民爲奴才任惠潮屬道時舊部此次接見各該紳等告以度支奇絀 宵旰憂勞莫不念食毛踐土之恩動好義急公之忱查本年春間經督撫臣會札潮州紳士前南韶連鎮總兵黃金福赴汕籌集各商報効一次洋銀十萬兩分作兩年解繳茲該紳商等公議願將前次籌辦之款改爲永遠報効自光緒二十六年起每年籌繳洋銀五萬兩解交督後局轉解藩庫存儲聽候部撥並懇仍照瑞麟所議潮屬永遠免釐釐捐稟由督後局司

道等會詳請奏前來奴才覆查潮屬各處設卡重抽商力未逮汕頭籌辦尤非衆商所願竊礙難行若勉強開辦該處華洋雜居必至有弊無利該紳商等仰體時艱情殷報効尙屬深明大義合無仰懇 天恩俯准其永遠報効免抽潮屬釐捐以順商情而示體恤允之○剛毅奏奴才承准軍機大臣字寄光緒二十五年八月初三日奉 上諭前據甘肅布政使岑春煊奏度支奇絀請飭清釐庫款核實造報外銷收支數目各摺片據稱廣惠歷年挪用庫款積至八百三十餘萬未經報部者五百八十餘萬如查係實用應准作正開銷嗣後外銷款項一律報部等語廣東地大物博出入各款爲數甚繁嗣後外銷之款應如何核實報部著剛毅悉心查核妥籌辦理據實具奏原摺清單鈔給閱看將此諭令知之等因欽此奴才遵卽札飭藩司丁體常等查明庫歷年不敷款項分別已經報部未經報部係挪何款支用及外銷款內歲入歲出各定數按款分晰開單並鈔發原摺去後嗣據該司等具詳呈報前來奴才督飭隨帶司員等澈底清查詳加覆核請爲 皇太后 皇上縷陳之查廣東藩庫從前地方安靖財賦充盈正雜收支有條不紊自咸豐四年軍興以後地丁則徵解不前鹽課則商逃準歇而海防軍需應用各款急如星火不得不量爲通融先其所急始因正項不足挪用部雜之款後庫部雜不足挪及寄款外款動外款以供正支並非挪正款以濟外用計自咸豐五年前藩司江國霖任內起至光緒二十四年岑春煊任內止

時四十四年官經三十六任總共不敷銀八百三十餘萬其挪欸之至鉅者如軍需海防善後經費共墊銀五百餘萬太平關京師陝甘協餉本省兵餉武職養廉共墊銀三百餘萬其短收之至鉅者如地丁實徵八成每年民欠十餘萬歷年併計不下數百萬運庫積欠兵餉武廉三百餘萬假使地丁徵收足額運庫積欠全消善後局歸還原墊善後經費則藩庫並無不足在當日通融挪墊本出一時權宜原冀催收歸欸再行撥正請銷故時閱多年迄未按欸造報祇於遞年奏銷盤庫時陳明在案此查明司庫正項不敷由庫部雜等欸之實在情形也藩庫欸目甚繁有正欸有部欸中有入春秋撥冊者有不入撥冊者正部之欸有各屬寄存候領候撥之欸有另項存儲聽候部撥之欸有收支久停連年餘賸之欸並非正部外即係外銷更非現存之銀全不報部向來交盤具結係專指正項而言前後任移交庫銀則無論何欸悉應交接清楚故結報正項無存與移交現銀實存劃然分爲兩事并非礙於外銷遂以實存作爲無存隱匿不報岑春煊以庫中挪用未報部銀至八百餘萬移交庫存實銀又逾百萬遂疑外銷欸之多其實所挪之欸係歷數十年積累而成至庫存實銀又多係應支未支應解未解報部之欸外銷者甚屬寥寥此查明司庫外銷之情形也奴才維司庫不敷一項地丁民欠既屢經豁免鹽庫等欸又無從追償而支解之軍需等項早已奏咨報銷挪借之部欸迄未開除達部以致銀雖挪用數尙虛存此時若不

將借墊之銀就款請銷從前之報帳既難以截清此後之收支卽無從核實似非慎重庫儲之道惟是款至八百餘萬之鉅時間四十餘年之久加之簿據檔案霉爛不全若令其逐一造冊必至外銷外銷遺漏合無仰懇 天恩俯念廣東司庫歷年挪用各款實爲借墊軍需兵餉京協之用委非濫支准將自咸豐五年三月十九日前藩司江國霖到任起至光緒二十四年十一月十五日岑春煊卸任止共挪借部雜外銷等款銀八百三十八萬二千六百四十八兩零六分一釐九毫一絲四忽零一律就款請銷已報部者歸入春秋撥冊按款開除未報部者由外開除其報部之款向不入撥冊者卽另附一冊隨同撥冊報部開除免其另造詳細清冊以歸簡易經此次清釐之後一切司庫收支概令核實造報卽遇本款不敷借支別款亦應隨時報明寬既往之愆正可杜將來之弊似於度支不無裨益至司庫外銷之款除昔有今無者不計外現值二十餘款歲入銀十萬數千兩數屬無多尙非濫用且此等款項或過地方有事倉卒籌集以本省籌出之款爲本省應辦之事勢難責其逐款報部惟釐務署後兩局外銷款項較多業經奴才於籌餉案內按年提存聽候撥用又原奏廣東州縣交代虧空極多一節查該省奉戶部奏定章程自光緒十一年起新案交代依限造冊結報其有微存銀米未清者均經歷任藩司詳請參追計自光緒十年起至二十四年岑春煊任內止先後參追一百六十九案共銀五十二萬零八百餘兩旋據督參員

陸續繳銀十四萬九千五百餘兩核計未完尚鉅已飭令加緊追繳又原奏運庫出入款項較藩庫尤爲
冒濫一節查鹽課額徵銀六十餘萬另鹽斤加價十萬每年共銀七十餘萬外銷各項多係出自商捐每
年約銀二十七萬餘兩多寡靡定以配鹽旺淡爲衡前運司英啟在任十餘年設法整頓商情踴躍運庫
遂有積存現除各商備買常平倉鹽價及購銷枝幹銅木等項外尙存銀六十餘萬實無二百餘萬之數
故所欠藩庫兵餉等銀三百餘萬仍屬無力籌還至鹽務差使多由商人稟請薪水經費出自商捐虛包
緝私廢向爲督署文案兼差督辦幕友候選同知潘燦循舊繼之前經調任撫臣鹿傳霖查覆在案嗣省
及丁憂人員充當鹽務差並非始於進益之且該員到平糧局差後辦事認真釐餉起色未及一年稟准
辭退亦無不合均可無庸置議付行允行○甲辰諭前據陶模陳請陸見已有旨准其來京著魏光燾
馳赴甘肅署理陝甘總督陶模著俟魏光燾接署後再行來京○是月日本國使臣矢野文雄回國西德
二耶繼之○英吉利國使臣寶納樂回任